

INNOCENTIUS IV

PAPA CLXXX

Anno Domini MCCXLIII

Innocentius quartus, antea Sinibaldus, Patria Genuensis, ex nobili Fliscorum Lavaniae genere, sanctae Romanae Ecclesiae presbyter cardinalis tituli Sancti Laurentii in Lucina, electus est Anagninae Romanus Pontifex die 24 mensis iunii 1243, et die 28 eiusdem, quae in dominicam incidebat, consecratus est. Sedit in pontificatu annos xi, menses v, dies x (1), imperantibus in Oriente Balduino II, in Occidente Friderico II imperatoribus; obiit Neapoli die 7 decembris 1254, et sepultus est ibidem in Ecclesia cathedrali. Vacavit sedes dies v

I.

Encyclicae Innocentii litterae de sua in Pontificem electione (2).

SUMMARIUM

De Coelestini obitu: — Suaque electione monet. — Episcopos hortatur ut suo fungantur ministerio, — Et pro ipso orent, — Et pro populo christiano.

Innocentius episcopus servus servorum Dei, N. Remensi archiepiscopo, eiusque suffraganeis, salutem et apostolicam benedictionem.

Felicis recordationis Coelestino Papa praedecessore nostro, qui bonae memoriae Gregorio Papae successerat infra modicum temporis spatium soluto carnis debito censuali ad superos, ut credimus, ut introeat in potentias Domini evocato, ac eius, ut moris est, exequiis in crastino celebratis, post vacationem diutinam, quae peccatis exigentibus propter malitiam temporis intervenit, fratres ad tantum subrogandi pastoris officium Anagninae con-

(1) A die consecrationis computandos. (2) Ex Raynald. ad annum 1243.

venientes in unum, tandem Spiritus Sancti gratia innovata, in nos providentiae suae oculos iniecerunt, imbecillibus humeris fascem tanti oneris imponere discernendo. Nos autem nostrae infirmitatis et insufficientiae conscii, vehementer expavimus hoc audito, quia mens coepit refugere, cor tremere, pondus importabile recusando, et ad retinendum omnino disposuit totis effectibus se armare. Verum ne diutina reluctatio in hoc tempestatis articulo aliquid discriminis pareret, cum temerarium videretur divinae dispositioni penitus obviare; ad Illum nostros oculos attollentes, qui dat lasso virtutem, et largitur munera in se sperantibus affluenter; quique nostrum considerans imperfectum, cum sit sufficientia omnium, insufficientiam nostram supplebit suae abundantia largitatis, dando gloriam nomini suo magno, vocationi divinae consensimus, et debiles humeros de superna virtute confisi submisimus ad portandum tanti ponderis gravitatem.

Vos itaque, fratres, qui estis ad custodiam gregis Domini deputati, rogamus attentius, et hortamur, ut Domino omnem curam et sollicitudinem subinferentes ad serviendum digne Deo per omnia, et implendum legitime pastorale ministerium, quod sumpsistis, ministrare in fide virtutum forma facti gregis ex animo, ut cum oves per sacrum profluvium oris vestri aquas hauserint in gaudio de fontibus Salvatoris, viderintque virgas pastorum, detractis corticibus vanitatis et voluptatis, divino candore nitentes, in contemplatione ipsarum affectiones mundas concipiant, et unicoloris foetus pariant masculinos digne Christo Domino pastorum principi offerendos. Non cessetis autem pro nobis per vos, vestrosque subiectos assiduas preces effundere, ut sua clementia de coelis mittat nobis sapientiam assistricem ad regendum populos nobis commissos, quae nos doceat cum Domino sollicitate ambulare, ac id agere coram Deo, quod nunc sibi, et omni

Suaque electione monet.

Episcopos hortatur ut suo fungantur ministerio,

Et pro ipso orent.

tempore sit acceptum, ut de sua plenitudine accipientes gratiae largitatem, dignam Domino rationem de suscepto ministerio reddere valeamus.

Et pro populo christiano.

Flagitate insuper quotidiane instanter, ut pacem Ecclesiae suae tribuat, et populo christiano barbaricam rabiem conterat, et gentem perfidam paganorum de finibus christianorum depellat. Nos enim honorare vos disponimus, diligere velut fratres, et in vestris necessitatibus vobis adesse, auctore Domino, utiliter, et prodesse. Caeterum cum portitores huiusmodi litterarum interdum esse consueverint exactores, volumus et mandamus, ut latori praesentium praeter victum, et si eum infirmari contigerit, necessaria, nihil penitus tribuatis, cum de non recipiendo praestiterit iuramentum, et alias pro labore et expensis sibi congrue satisfiat.

Datum Anagninae sexto nonas iulii, pontificatus nostri anno primo.

Dat. die 2 iulii 1243, pontif. an. 1.

II.

Approbatio legum a Friderico imperatore, hactenus in obedientia sanctae Romanae Ecclesiae persistente, contra haereticos, eorumque complices et fautores editarum

SUMMARIUM

De legibus huiusmodi confirmatis observandis. — Lex I. — 1. Exordium. — 2. Ab Ecclesia damnati curiae saeculari tradendi. — 3. Poenitentes perpetuo carceri mancipandi. — 4. Reperti inquisitoribus consignandi. — 5. Simili poena plectendi eorum fautores. — 6. Transfugae simili modo capiendi. — 7. Morte plectendi relapsi. — 8. Haeretici beneficio appellationis non gaudent. — 9. Eorum posteris officiis, beneficiis et possessionibus privandi. — 10. Revelantes autem indennes servandi. — 11. Inquisitores defendendi. — 12. Haeretici ubique capiendi. — Aliae contra haereticos leges; — Haeticorum fraus; —

Patarenorum impietas. — Lex II. — 1. Crimen haeresis inter publica crimina numerandum. — 2. De ea itaque convicti comburantur. — Patarenorum fautores relegandi. — Lex III. — 1. Ii vero, qui eos detexerint, pristinae famae restituendi. — Eorum poenae. — Constitutio. — 1. Suspicione notabiles nisi se purgaverint, banno subiiciuntur. — 2. A civitatum rectoribus praestandum iuramentum pro fidei defensione. — 3. Poenae receptatorum, defensorum etc. — 4. Poenae quoque apostatarum.

Gregorius episcopus servus servorum Dei, dilectis filiis potestatibus, consiliis, et communitatibus civitatum, aliorumque locorum Lombardiae, Marchiae Tarvisinae, ac Romaniolae, salutem et apostolicam benedictionem.

Cum adversus haereticam pravitatem quondam Fridericus Romanorum imperator promulgaverit quasdam leges, per quas ne pervagetur, compesci poterit pestis illa, nos illas volentes ad robur fidei ac salutem fidelium observari, universitati vestrae per apostolica scripta mandamus, quatenus eas, quarum tenores vobis mittimus, insertos praesentibus, faciatis singuli in vestris capitularibus annotari, contra haereticos sectae cuiuslibet secundum eas exacta diligentia processuri. Alioquin dilectis filiis priori, provinciali, et fratribus inquisitoribus haereticae pravitate ordinis Praedicatorum in Lombardia, Marchia Tarvisina, et Romaniola litteris nostris iniungimus, ut vos ad id per excommunicationem in personas, et interdictum in terram, appellatione remota, compellant.

Sequuntur leges dicti Friderici imperatoris.

Fridericus Dei gratia Romanorum imperator, et semper Augustus, Hierusalem, et Siciliae rex, dilectis principibus suis, venerabilibus archiepiscopis, aliisque praelatis Ecclesiarum, ducibus, marchionibus, comitibus, baronibus, potestatibus, scultetis, burgaviis, advocatis, iudicibus, ministerialibus, officialibus, et omnibus

De legibus huiusmodi confirmatis observandis.

per totum imperium constitutis, praesentes litteras inspectoris fidelibus suis, gratiam suam, et omne bonum.

Exordium

§ 1. Commissi nobis coelitus cura regiminis, et imperialis, cui dante Domino praesidentes fastigium dignitatis, materialem, quo divisim a sacerdotio fungimur, gladium adversos hostes fidei, et in exterminium haereticae pravitatis exigunt exercendum, ut perfidiae vipersos filios contra Deum et Ecclesiam insultantes, tamquam materni uteri corrosos, in iudicio et iustitia persequamur, maleficos vivere non passuri, per quorum scientiam seducentem mundus inficitur, et in gregem fidelium per oves has morbidas gravior instigatur corruptela.

Ab Ecclesia damnati curiae saeculari tradendi.

§ 2. Statuimus itaque sancientes, ut haeretici quocumque nomine censeantur, ubicumque per imperium damnati fuerint ab Ecclesia, et saeculari iudicio assignati, animadversione debita puniantur.

Poenitentes perpetuo carceri mancipandi.

§ 3. Si qui vero de praedictis postquam fuerint deprehensi, territi metu mortis, redire voluerint ad fidei unitatem, iuxta canonicas sanctiones ad agendam poenitentiam in perpetuum carcerem detrudantur.

Reperiti loquistoribus consignandi.

§ 4. Praeterea, quicumque haeretici reperti fuerint in civitatibus, oppidis, seu aliis locis imperii per inquisitores ab Apostolica Sede datos et alios orthodoxae fidei zelatores; hi qui iurisdictionem ibidem habuerint, ad inquisitorum, et aliorum catholicorum virorum insinuationem eos capere teneantur: et eos captos arctius custodire, donec per censuram ecclesiasticam damnatos, damnabili morte perimant, qui fidei sacramenta et vitae damnabant.

Simili poena plectendi eorum fautores

§ 5. Simili quoque poena plecti censemus omnes, quos ad fovendum haeticorum errorem callidus hostis suscitavit advocatos, vel parat illicitos defensores; maxime cum facinus quos inquinat, aequat: nisi monitione praemissa destiterint, et eorum vitae duxerint consulendum.

§ 6. Eos praeterea qui convicti in uno

loco de haeresi, ad alia loca se transferunt, ut cautius possint effundere virus haereticae pravitatis, debitam censemus subire vindictam, ut super hoc viros ab eodem errore conversos ad fidem, nec non et per alios, qui eos de haeresi convicerunt (quod et in hoc casu concedimus licite faciendum) evidens testimonium habeatur.

Transfugae simili modo capiendi.

§ 7. Item mortis sententiae ducimus addicendos, si quos haeticorum ad iudicium tractos, in extremae vitae periculo haeresim abiurantes, postmodum de falso iuramento constiterit, et fide mentita convinci, ac eos contigerit eiusdem morbi spontaneam incurrere recidivam: ut sibi damnabilius iniquitas sit mentita, et poenam debitam mendacium non evadat.

Morte plectendi re lapsi.

§ 8. Omne insuper proclamationis, et appellationis beneficium, ab haeticis, receptatoribus et fautoribus eorundem, penitus amovemus: volentes ut de finibus imperii, in quibus semper debet existere fida fides, haereticae labis germina modis omnibus deleantur.

Haeretici beneficio appellationis non gaudent.

§ 9. Caeterum quia quanto maiora divinae nutu miserationis accepimus, et altiore locum prae filiis hominum obtinemus, tanto devotiora debemus obsequia gratitudinis conferenti, si quando in nostri nominis contemptores nostri culminis excandescit auctoritas, si reos laesae maiestatis in personis eorum, et liberorum suorum exhaeredatione damnamus, multo fortius iustiusque contra Dei blasphematores nominis, et catholicae fidei detractores provocamur, eorundem haeticorum, receptatorum, fautorum et advocatorum suorum, haeredes et posteros, usque ad secundam progeniem, beneficiis cunctis temporalibus, publicis officiis, et honoribus, imperiali auctoritate privantes, ut in patris memoria criminis continuo moerore tabescant, vere scientes, quod Deus zelotes est, peccata patrum in filios potenter ulciscens.

Eorum posteris officiis, beneficiis et possessionibus privandi.

§ 10. Nec quidem a misericordiae

Revelantes autem indemnes servandi.

finibus duximus excludendum, ut qui paterna haeresis non sequaces, latentem patrum perfidiam revelaverint, quacumque reatus illorum animadversione plectantur, praedictae punitioni non subiaceant innocentiae filiorum.

Inquisitores defendendi.

§ 11. Ad haec, notum fieri volumus fratres Praedicatores de ordine Praedicatorum, pro fidei negotio in partibus imperii nostri contra haeticos deputatos, caeteros quoque qui ad haeticos iudicandos accesserint, nisi aliqui eorum ab imperio fuerint proscripti, eundo, morando et redeundo, sub nostri imperii speciali defensione receptos, et quos apud omnes, sub ope ac recommendatione fidelium imperii esse volumus inoffensos. Universitati vestrae mandantes, quatenus quocumque, et apud quemcumque vestrum pervenerint, benigne recipiatis eosdem; et personas ab incursu haeticorum eis insidiantium conservantes indemnes, omne consilium, ducatum et auxilium impendatis, pro tam acceptis coram Deo negociis exequendis.

Haeretici ubique capiendi.

§ 12. Haeticos vero, quos et ostenderit ipsi vobis in iurisdictione vestra singuli capientes, diligenti custodia detinendos, donec post ecclesiasticae damnationis iudicium, poenam subeant, quam merentur. Scituri quod in executione ipsius negotii, gratum Deo, et laudabile nobis obsequium conferetis, si ad expellendam de partibus nostri imperii novam et insolitam haereticae pravitatis infamiam opem et operam, una cum eisdem fratribus, praestiteritis efficacem, et si quis foret exinde negligens, et remissus, ac etiam inutilis, coram Domino, et in conspectu nostro poterit merito culpabilis apparere.

Datum Paduae 22 februarii, decima secunda indictione.

FRIDERICUS DEI GRATIA etc.

Inconsutilem tunicam Dei nostri dissuere conantur haetici, et vocabuli vitio

servientes; quod significationem divisionis enunciat, in ipsius indivisibilis fidei unitate nituntur inducere sectionem: et oves a Petri custodia, cui pascendae a Pastore bono sunt creditae, segregare. Hi sunt lupi rapaces intrinsecus, eo usque mansuetudinem praetendentes ovium, quousque ovile possint subintrare dominicum. Hi sunt angeli pessimi. Hi sunt filii pravitatum, a patre nequitiae et fraudis auctore, ad animas simplices destinati. Hi colubri, qui columbas decipiunt. Hi serpentes, qui latenter videntur inserpere, et sub mellis dulcedine, virus evomere. Ut vitae cibum ministrare se simulent, a cauda feriunt, et mortis poculum velut quoddam dirissimum venenum immiscent. Horum sectae veteribus, vel ne in publicum prodeant, non sunt notatae nominibus, vel (quod est forte nefandius) non contentae, ut vel ab Arrio Arriani, vel a Nestore Nestoriani, aut a similibus similes nuncupentur, sed in exemplum martyrum, qui pro fide catholica martyria subierunt, Patarenos se nominant, velut expositos passioni. Huiusmodi miseri Patareni a quibus abest sancta credulitas divinitatis aeternae, sub uno contextu nequitiae insimul tres offendunt; Deum, videlicet, proximos, et seipsos. Deum, dum Dei fidem, et Filium non agnoscunt. Decipiunt proximos, dum ipsis sub spe spiritualis alimoniae, haereticae pravitatis oblectamenta ministrant. Crudelius etiam saeviunt in se ipsos, dum post animarum dispendium, corpora denique severae mortis illecebris, quam per agnitionem veram et verae fidei possent evadere, vitae prodigi, et necis improvidi sectatores, involvunt: et (quod est ipso dictu dirissimum) superstites etiam non terrentur exemplo.

Aliae contra haeticos leges;

Haeticorum fraus;

Patarenorum impietas.

Crimen haeresis inter publica crimina numerandum.

prope Romanam Ecclesiam, quae caput Ecclesiarum omnium iudicatur, superstitionis suae scelera latius exercere noscuntur; adeo quod ab Italiae finibus, praesertim a partibus Lombardiae, in quibus pro certo perpendimus ipsorum nequitiam latius abundare, iamque usque ad regnum nostrum Siciliae, suae perfidiae rivulos derivarunt. Quod acerbissimum reputantes, statuimus in primis, ut crimen haereseos et damnatae sectae cuiuslibet, quocumque nomine censeantur sectatores (prout veteribus legibus est indictum), inter publica crimina numeretur. Imo crimine laesae maiestatis nostrae debet ab omnibus horribilius iudicari, quod in divinae maiestatis iniuriam noscitur attentatum, quamvis iudicii potestate, alterum alteri non excellat. Nam sicuti perduellionis crimen personas admittit damnatorum et bona, et damnat post obitum memoriam defunctorum: sic et in praedicto crimine, quo Patareni notantur, per omnia volumus observari.

De ea itaque convelli debentur.

§ 2. Et ut ipsorum nequitia, qui (quia Dominum non sequuntur) in tenebris ambulat, detegatur: nemine etiam deferente, investigari volumus diligenter huiusmodi scelerum patratores, et per officiales nostros, sicut et alios malefactores inquiri. Ac inquisitione notatos, etsi levis superstitionis argumento tangantur, a viris ecclesiasticis et praelatis examinari iubemus; per quos si inventi fuerint a fide catholica saltem in articulo deviare, ac per ipsos pastoralis more communiti, tenebrosi diaboli relictis insidiis, noluerint agnoscere Deum lucis, sed in erroris concepta instantia perseverent, praesentis nostrae legis edicto damnatos mortem pati, Patarenos, aliosque haereticos quocumque nomine censeantur, decernimus, quam affectant, ut vivi in conspectu hominum comburantur, flammaram commissi iudicio. Nec dolemus, quod in hoc ipsorum satisfacimus voluntati, ex quo poenam solummodo, nec fructum alium consequuntur erroris.

§ 3. Apud nos pro talibus nemo intervenire praesumat, quod qui fecerit, in ipsum nostrae indignationis aculeos non immerito convertemus.

Datum Paduae, 22 februarii, decima secunda indictione.

Imperator Fridericus semper Augustus, etc.

Patarenorum receptatores et complices et quocumque modo fautores, qui ut a poena alios possint eximere, de se velut improvidi non formidant, publicatis bonis omnibus, relegandos in perpetuum esse censemus.

Patarenorum fautores relegandi.

§ 1. Et ipsorum filii ad honores aliquos nullatenus admittantur. Si tamen aliquis fautorum huiusmodi detexerit aliquem Patarenum, de cuius perfidia manifeste probatur, in fidei praemium, quam agnovit, famae pristinae de imperiali clementia restitutionis beneficium in integrum consequatur.

Si vero, qui eos detexerint, pristinae famae restituendi.

Incipiunt capitula constitutionis contra Patarenos, aliosque haereticos editae per eundem Fridericum illustrem virum, Romanorum imperatorem semper Augustum, Hierusalem et Siciliae regem.

Catharos, Patarenos, Speronistas, Leonistas, Arnaldistas, Circumcisos, Passaginos, Iosephinos, Garatenses, Albanenses, Franciscos, Bagnarolos, Commixtos, Waldenses, Roncarolos, Communellos, Warinos et Ortolenos, cum illis de Aquanigra et omnes haereticos utriusque sexus quocumque nomine censeantur, perpetua damnamus infamia, dissipamus, atque banimus. Censentes ut bona talium confiscentur, nec ad eos ulterius revertantur: ita quod filii eorum ad successionem pervenire non possint, cum longe sit gravius aeternam, quam temporalem offendere maiestatem.

Eorum poenae.

§ 1. Qui autem inventi fuerint sola suspitione notabiles, nisi ad mandatum Ecclesiae, iuxta considerationem suspitionis, qualitatemque personae, propriam

Suspitione notabiles nisi se purgaverint banno subiciantur.

innocentiam congrua purgatione monstraverint; tamquam infames et banniti ab omnibus habeantur: ita quod si per annum permanserint, ex tunc eos sicut haereticos condemnemus.

A civitatum rectoribus praestandum iuramentum pro dei defensione.

§ 2. Statuimus etiam hoc edicto in perpetuum valituro, ut potestates et consules, seu rectores, quibuscumque fungantur officiis, pro defensione fidei praestent publicum iuramentum, quod de terris suae ditioni subiectis universos haereticos ab Ecclesia denotatos, bona fide pro viribus exterminare studebunt. Ita quodammodo quodcumque quis fuerit in perpetuam honestatem (1), vel temporalem assumptus, hoc teneatur capitulum iuramento firmare. Alioquin neque pro potestatibus, neque pro consulibus, seu consimilibus habeantur: eorumque sententias ex tunc decernimus inutiles et inanes. Si vero dominus temporalis, requisitus et monitus ab Ecclesia, terram suam purgare neglexerit ab haeretica pravitare, post annum a tempore monitionis elapsam, terram ipsius exponimus catholicis occupandam, qui eam, exterminatis haereticis, absque ulla contradictione possideant, et in fidei puritate conservent, salvo iure domini temporalis: dummodo super hoc nullum praestet obstaculum, nec aliquod impedimentum opponat. Eadem nihilominus lege servata, contra eos qui non habent dominos principales.

Poenae receptatorum, defensorum etc.

§ 3. Credentes praeterea, receptatores, defensores et fautores haereticorum banimus. Statuentes, ut si postquam quilibet talium fuerit excommunicatione notatus, satisfacere contempserit infra annum, ex tunc ipso iure sit factus infamis et ad publica officia, seu consilia, vel ad aliquos eligendos huiusmodi, nec ad testimonium admittatur. Sit etiam intestabilis, ut nec testamenti liberam habeat factionem, nec ad haereditatis successionem accedat. Nullus ei praeterea super quocumque negotio, sed ipse aliis respondere cogatur. Quod si iudex extiterit,

(1) Legendum potestatem.

eius sententia nullam obtineat firmitatem, nec causae aliquae ad eius audientiam perferantur. Si fuerit advocatus, eius patrocinium nullatenus admittatur. Si tabellio, eius instrumenta confecta per manum ipsius nullius penitus sint momenti. Adiciamus insuper, quod haereticus per haereticum convinci possit, et quod domus Patarenorum, receptatorum et defensorum et fautorum, sive ubi docuerint, sive ubi aliis manus imposuerint, destruantur, nullo tempore restituendae. Dat. Paduae, 22 februarii decima secunda indict.

§ 4. Rex regum apostatantes a Fide catholica penitus execramus, insequimur ultionibus, bonis suis omnibus spoliamus: et ut a professione, vel vita naufragantes, legibus coarctamus: successiones tollimus, ab eis omne ius legitimum abdicamus.

Poenas quoque apostata um.

Datum Perusii, secundo kalendas novembris, pontificatus nostri anno primo.

Dat die 31 octobris 1243, pontif. an. 1.

III.

Concessio indulgentiarum christifidelibus visitantibus Ecclesias fratrum ordinis Eremitarum Sancti Augustini nonnullis statutis festis anni diebus (1)

SUMMARIUM

Exordium. — Causae privilegii. — Indulgentiarum concessio cum designatione dierum.

Innocentius episcopus servus servorum Dei, universis christifidelibus praesentes litteras inspecturis, salutem et apostolicam benedictionem.

Quoniam (ut ait Apostolus) omnes stabimus ante tribunal Christi, prout in corpore gessimus, sive bonum fuerit, sive malum, oportet nos diem messonis extremum misericordiae operibus praeve-

Exordium.

(1) Edidit Empolus in Bullar. huius Ordinis

nire, ac aeternorum intuitu seminare in terris, quod reddente Domino cum multiplicato fructu recolligere debeamus in coelis; firmam spem, fiduciamque tenentes, quoniam qui parce seminat, parce et metet, et qui seminat in benedictionibus, de benedictionibus et metet vitam aeternam.

Causae privilegii.

Cum igitur dilecti filii generalis et fratres Eremitarum Sancti Augustini ordinis, sicut ipsi in sua nobis petitione monstrarunt, domus et ecclesiae eorum non modicum indigeant reparatione, nec propriae sufficiant facultates ad reparationem praedictarum, cum sit eis necessarium per meditata suffragia, praestare cupientes. Itaque sicut domos suscepimus in nostra protectione, et reparatione indigere noscantur non modicum sumptuosa; nos cupientes, ut domos Ecclesiae praedictae congruis honoribus frequententur et reparentur, ac etiam conserventur, et ut christifideles eo libentius causa devotionis confluant, et ad easdem ecclesias et domos, ac de reparatione et conservatione praedictarum manus protinus porrigant adiutrices, quo ex hoc ibidem in domo coelestis gratiae uberius conspexerint se relectos; de omnipotentis Dei misericordia, et beatorum Petri et Pauli apostolorum eius auctoritate confisi, omnibus vere poenitentibus et confessis, qui in Nativitatis, Circumcisionis, Epiphaniae, Resurrectionis, Ascensionis, Pentecostes; necnon in Assumptionis, Nativitatis, Annuntiationis et Purificationis Beatae Mariae, ac a dominica Septuagesimae inclusive, usque ad dominicam in Palmis, et die Mercurii, die Iovis et die Veneris hebdomadae Sanctae, ac Nativitatis beati Ioannis Baptistae, ac apostolorum Petri et Pauli, in solemnitatibus Apostolorum et Evangelistarum, ac in omnibus festivitibus S. Augustini, dictis Ecclesiis dedicationis festivitibus, et celebritate Omnium Sanctorum; et ipsas Nativitatis, Circumcisionis, Epiphaniae, Resurrectionis, Ascen-

Indulgentiarum concessio cum designatione dierum.

sionis, Pentecostes; necnon Nativitatis, Assumptionis B. Mariae et Nativitate B. Ioannis Baptistae, et apostolorum Petri et Pauli praedictarum festivitatum octavas, praefatas ecclesias devote visitaverint annuatim, et ad reparationem et conservationem praedictarum manus porrexerint adiutrices, ut praefertur, singulas videlicet festivitatum, et eorum octavas, et celebritate et dierum praedictorum, videlicet a dominica septuagesimae usque ad dominicam Palmarum, mille annos et totidem quadragenas, illorum vero tantum dierum praedictorum diebus, quibus praedictas Ecclesias visitaverint, et ad reparationem et conservationem earumdem manus porrexerint adiutrices, ut praefertur, a poena et a culpa misericorditer relaxamus. Praesentibus perpetuis futuris temporibus duraturis.

Datum Laterani sexto kalendas maii, pontificatus nostri anno primo.

Dat. die 26 aprilis 1244, pontif. anno 1.

IV.

Hortatio ad regem Franciae, ut in suo regno concremari faciat librum Talmud, quo utuntur iudaei, eisque prohibeat nutrices et servientes habere christianos (1).

SUMMARIUM

Iudaeorum iniquitates multae. — 1. Talmud liber impius. — 2. Quam sit indignum, ut nutrices habeant christianas. — 3. Talmud liber a cancellario Parisiensi igni traditus. — 4. Regem adhortatur ut impios iudaeorum libros cremari faciat: — 5. Prohibeatque ne iudaei nutrices et servientes habeant christianos.

Innocentius episcopus servus servorum Dei, charissimo in Christo filio illustri regi Franciae, salutem et apostolicam benedictionem.

Impia iudaeorum perfidia, de quorum cordibus propter immensitatem suorum

(1) Iudaeis nutrices, famulos habere christianos prohibuere Honorius III, Const. LIV, tom. hoc III, pag. 380, et Gregorius IX, Constit. XXXVI, pag. 479.

scelerum Redemptor noster velamen non abstulit, sed in caecitate, quae contingit ex parte, in Israel adhuc manere permittit, prout convenit, non attendens, quod ex sola misericordia pietas ipsos christiana receptet et cohabitationem illorum sustineat patienter, illa committit enormia, quae stupori audientibus et referentibus sunt horrore. Ipsi enim ingrati Domino Iesu Christo, qui conversionem eorum ex suae longanimitatis affluentia patienter expectat, nullam praetendentes verecundiam culpa suae, nec reverentes honorem fidei christianae, omissis, seu contemptis lege mosaica et prophetis, quasdam traditiones suorum seniorum sequuntur. Super quibus eos in Evangelio Dominus obiurgat dicens: Quare vos transgredimini mandatum Dei, et irritum fecistis propter traditiones vestras, hominum doctrinas et mandata docentes.

Iudaeorum iniquitates multae.

Talmud liber impius.

§ 1. In huiusmodi namque traditionibus (quae Talmud hebraice nuncupantur, et magnus liber est apud eos, excedens textum Bibliae in immensum, in quo sunt blasphemiae in Deum et Christum eius, ac Beatam Virginem manifeste, intricabiles fabulae, abusiones erroneae, ac stultitiae inauditae) filios suos docent ac nutriunt, et a legis, et prophetarum doctrina reddunt ipsos penitus alienos. Verentes ne veritate, quae in eisdem lege ac prophetis est, intellecta, aperte de unigenito Dei Filio venturo in carnem testimonium perhibente, convertantur ad fidem, et ad Redemptorem suum humiliter revertantur.

Quam sit indignum, ut nutrices habeant christianas.

§ 2. Et his non contenti, faciunt christianas filiorum suorum nutrices in contumeliam fidei christianae, cum quibus turpia multa committunt. Propter quae fidelibus est verendum, ne divinam indignationem incurrant, dum eos perpetrare patiuntur indigne, quae fidei nostrae confusionem inducunt.

§ 3. Et licet dilectus filius cancellarius Parisiensis, et doctores regentes Parisiis in sacra pagina, de mandato fe-

licis recordationis G. Papae praedecessoris nostri, tam praedictum abusionis librum, quam alios quosdam cum omnibus glossis suis perlectis in potestate, ac examinatos ad confusionem perfidiae iudaeorum, publice coram clero et populo, incendio concremarint, prout in litteris eorum perspeximus contineri, quibus tu tamquam catholicus rex, et princeps christianissimus impendisti super hoc auxilium congruum, et favorem, pro quo regalem excellentiam dignis in Domino laudibus commendamus, ac prosequimur actionibus gratiarum.

§ 4. Quia tamen nondum iudaeorum ipsorum abusio prophana quievit, nec adhuc dedit eis vexatio intellectum; celsitudinem regiam rogamus, et obsecramus in Domino Iesu Christo, ut qui excessus huiusmodi detestabiles, et enormes, commissos in contumeliam Creatoris, et iniuriam nominis christiani, pie incaepisti laudabiliter prosequendo, facias debita severitate percelli. Et tam praedictos abusionis libros, reprobatos per doctores eosdem, quam generaliter omnes cum glossis suis, qui per ipsos examinati et reprobati fuerint, mandes per totum regnum tuum, ubicumque reperiri poterunt, igne cremari.

§ 5. Firmiter inhibendo ne de caetero nutrices, seu servientes habeant christianos, ne filii liberae filii famulentur ancillae. Sed tamquam servi reprobati a Domino, in cuius mortem nequiter conspirarunt, saltem per effectum operis, servos se recognoscant illorum, quos Christi mors, et istos liberos, et illos constituit esse servos: ut proinde sinceritatis tuae zelum possimus in Domino dignis laudibus commendare.

Dat. Lateran. septimo idus maii, pontificatus nostri anno primo.

Dat. die 9 maii 1244, pontif. anno 1.

Talmud liber a cancellario Parisiensi igni traditus.

Regem adhortatur ut impios iudaeorum libros cremari faciat.

Prohibeatque ne iudaei christianos habeant nutrices et servientes.

V.

Convocatio abbatum et priorum Angliae ad generale concilium Lugdunense primum, pro die 24 iunii 1245.

SUMMARIUM

Exordium. — 1. Causae indicendi concilii. — 2. Indictio pro die 24 iunii. — 3. Fridericum imperatorem citatum esse significat.

Innocentius episcopus servus servorum Dei, dilectis filiis abbatibus et prioribus per Angliam constitutis, salutem et apostolicam benedictionem.

Exordium Dei virtus et Dei sapientia, cuius ineffabili subiecta sunt omnia maiestati, a foundationis initio splendore virtutum suam illustravit Ecclesiam. Et sic insignem reddidit singularis privilegio potestatis, ut per eius ministerium suum iustitia consequatur effectum, et sedato bellorum turbine, mundo possit tranquillitas provenire.

Causae indicendi concilii. § 1. Huiusmodi enim praeminentiam dignitatis, dum nos reverenter attendimus, qui regimini generalis Ecclesiae, licet immeriti, divina providentia praesidemus, reddimur corde solliciti, quod tempestatis horror, qua ipsa turbatur Ecclesia, et religio christiana concutitur, per nostrae provisionis auxilium coelesti pietate propitia propulsetur. Hinc est, quod nos, ut ipsa Ecclesia per fidelium salubre consilium, et auxilium fructuosum, status debiti possit habere decorem, ac deplorando Terrae Sanctae discrimini et afflicto Romano imperio propere valeat subvenire, ac invenire remedium contra Tartaros, et alios contemptores fidei, ac persecutores populi christiani, necnon pro negotio, quod inter Ecclesiam et principem vertitur, reges terrae, praelatos Ecclesiarum, et alios mundi principes duximus advocandos.

Indictio pro die 24 iunii. § 2. Rogamus etiam devotionem vestram, et hortamur attente, per apostolica vobis scripta praecipiendo mandantes,

quatenus ad praesentiam nostram, omni prorsus occasione postposita, usque ad proximum festum Sancti Ioannis Baptistae, personaliter venire curetis, ut ipsa Ecclesia ex vestrae visitationis honore spirituale gaudium, et ex nostra industria consilium percipiat profuturum.

§ 3. Scituri, quod nos dictum principem in praedicatione nostra citavimus, ut per se, vel per suos nuncios in concilio celebrando compareat, responsurus nobis et aliis, qui aliquid contra ipsum duxerint proponendum, et satisfactionem idoneam praestiturus.

Fridericum imperatorem citatum esse significat.

§ 4. De personarum autem, et eventuum moderato numero, illam cum veneritis providentiam habeatis, quod vestris Ecclesiis nimis non sitis onerosi.

Datum Lugduni, tertio kalend. februarii, pontificatus nostri anno secundo.

Dat. die 30 ianuarii 1245, pontif. anno II.

VI.

Fridericum secundum imperatorem excommunicans, iure imperii deturbatum, subditosque iuramenti religione solutos declarat.

SUMMARIUM

Proemium. — 1. Fridericus ab Innocentio ad pacem invitatus. — 2. Aequae leges indictae. — 3. De illius pervicacia queritur Innocentius. — Sacramento oratorum opera ad sarcienda Ecclesiae damna se devinxit Fridericus. — 4. Obiecta ipsi a Pontifice capita. — 5. Saepius crimine periurii se devinxit. — 6. Concessam a Christo Pontifici auctoritatem negavit. — 7. Pontificiam ditionem occupavit. — 8. Iurata cum Gregorio pacis leges violavit. — 9. Siculam Ecclesiam oppressit. — 10. Sacrilegii scelere se inquinavit. — 11. Iusta haereticis suspicione aspersus. — 12. Saracenis, hostibusque religionis iunctus foedere. — 13. Bavariae ducis occisor, Battaccio schismatico filiam dedit in uxorem. — 14. Debitum pro regno Siciliae vectigal non solvit. — 15. Iure imperii et regni privatur. — Vassallique iuramento solvantur.

Innocentius episcopus servus servorum Dei, sacro praesente Concilio ad rei memoriam semel-tornam.

Proemium

Ad Apostolicae dignitatis apicem, licet indigni, dignatione divinae maiestatis assumpti, omnium christianorum curam vigili sedulaque solertia gerere, ac intimae considerationis oculo, singulorum facta et dicta discernere, et providae deliberationis statera librare debemus, ut quos iusti rigor examinis dignos ostenderit, congruis attollamus, et evehamus favoribus: quos autem reos et culpabiles invenerimus, poenis debitis pro gravitate culpa afficiamus, et deprimamus; appendentes semper meritum praemium aequa lance, retribuendo cuique iuxta qualitatem operis, sive boni, sive mali, poenae, vel gratiae quantitatem.

§ 1. Sane cum diu bellorum diuturna commotio nonnullas professionis christianae provincias et regiones graviter afflisset, nos toto cupientes mentis affectu tranquillitatem et pacem Ecclesiae Sanctae Dei, ac generaliter cuncto populo christiano restituere, ac reducere, ad praecipuum principem saecularem, huius dissensionis ac tribulationis auctorem, a felicitis recordationis Gregorio Papa praedecessore nostro, pro suis excessibus anathematis vinculo innodatum, speciales nuncios magnae auctoritatis viros, venerabiles videlicet fratres nostros P. Albanensem, tunc autem temporis Rothomagensem archiepiscopum, et W. Sabinensem nunc, quondam vero Mutinensem episcopos, ac dilectum nostrum filium Guillelmum basilicae Duodecim Apostolorum presbyterum cardinalem, tunc abbatem Sancti Facundi, qui salutem zelabantur ipsius, duximus destinandos; facientes sibi proponi per ipsos, quod nos et fratres nostri, quantum in nobis erat, pacem per omnia habere nitimur, ut cum omnibus hominibus parati sumus, optabamus pacem sibi et tranquillitatem dare, ac mundo etiam universo. Et quia prae-

Fridericus ab Innocentio ad pacem invitatus

latorum clericorum, omniumque aliorum, quos detinebat captivos, et omnium tam clericorum, quam laicorum, quos cesserat in galeis, restitutio poterat esse pacis et reconciliationis plurimum inductiva, illum, ut eos restitueret (et cum hoc idem tam ipse, quam sui nuncii, antequam ad apostolatus vocati essemus officium, promisissent) rogari et peti ab ipso fecimus per eosdem, ac proponi insuper, quod iidem pro nobis parati erant audire et tractare pacem, etiam audire satisfactionem, quam facere vellet princeps de omnibus, pro quibus vinculo erat excommunicationis astrictus, et offerri.

§ 2. Praeterea, quod si eum in aliquo contra debitum laeserat Ecclesia, quod tamen non credebat, parata erat corrigere, ac in statum debitum reformare, etsi diceret ipse, quod illum nos contra iustitiam laesisset, parati eramus vocare reges, praelatos et principes tam ecclesiasticos, quam saeculares ad aliquem tutum locum, ubi simul per se, vel per solemnes nuncios convenirent, eratque parata Ecclesia etiam de consilio concilii sibi satisfacere, si eum laesisset in aliquo, ac revocare excommunicationis sententiam, si quam contra ipsum iniuste tulisset, et eum omni mansuetudine et misericordia quantum cum Deo et honore suo fieri poterat, tractare, et de iniuriis et offensis ipsi Ecclesiae suisque per eum irrogatis satisfactionem ab ipso recipere. Volebat etiam Ecclesia omnes amicos suos, sibi adhaerentes in pace ponere, plenaque securitate gaudere, ut nunquam hac occasione posset aliquid in posterum subire discrimen aut periculum.

§ 3. Sed licet sic apud eum pro pace paternis monitis, et precum insistere curaverimus lenitate, idem tamen Pharaonis imitatus duritiam, et more aspidis obturans aures suas, huiusmodi preces et monita, elata obstinatione, ac obstinata elatione et superbia despexit, ac contempsit, et licet processu temporis in

Aequae leges indictae.

De illius pervicacia queritur Innocentius.

die Coenae Domini proximo nuper praeterito praecedente coram nobis et fratribus nostris cardinalibus, praesentibus charissimo in Christo filio nostro Constantinopolitano imperatore illustri, coetu quoque non modico praelatorum, et de senioribus, ac sanioribus senatoribus, populoque romano, et maxima multitudine aliorum, qui eodem die propter solemnitatem ipsius de diversis mundi partibus ad Apostolicam Sedem convenerunt, quod staret mandatis nostris et Ecclesiae per nobilem virum comitem Tolosanum, ac magistros Petrum de Vinea, et Thadaeum de Suessa curiae suae iudices, et procuratores suos speciale super hoc ab ipso mandatum habentes, praestiterit iuramentum; postmodum tamen, quod iuraverat non implevit. Quinimo ea intentione ipsum praestitisse iuramentum probabiliter creditur, sicut ex factis sequentibus colligitur evidenter, ut eidem Ecclesiae, ac nobis illuderet potius, quam pareret: cum anno et amplius iam elapso, nec ad ipsius Ecclesiae gremium revocari potuerit, nec sibi de illatis ei damnis et iniuriis curaverit satisfacere, licet super hoc extiterit requisitus. Propter quod non volentes, nec etiam valentes, absque gravi Iesu Christi offensa, eius iniquitates et scelera amplius tolerare, cogimur, urgente nos conscientia, animadvertere in eundem.

§ 4. Et ut ad praesens de caeteris eius sceleribus et iniquitatibus taceamus, quatuor gravissima, quae nulla possunt celari tergiversatione, commisit. Deieravit enim multoties; pacem quondam inter Ecclesiam et imperium reformatam temere violavit; perpetravit etiam sacrilegium, capi faciens cardinales sanctae Romanae Ecclesiae, ac aliarum Ecclesiarum praelatos et clericos religiosos et saeculares, venientes ad concilium, quod idem praedecessor noster duxerat convocandum; de haeresi quoque non dubiis et levibus, sed difficilibus et evidentibus argumentis suspectus habetur.

§ 5. Plura siquidem eum commisisse periuria, satis patet; nam olim cum in Siciliae partibus commorabatur, priusquam esset ad imperii dignitatem electus coram bonae memoriae G.... Sancti Theodori diacono cardinali Apostolicae Sedis legato, felicitis recordationis Innocentio Papae praedecessori nostro et successoribus eius, Ecclesiaeque Romanae pro concessionem regni Siciliae ab eadem Ecclesia sibi facta, fidelitatis praestitit iuramentum, et sicut dicitur, illud idem, postquam ad eandem dignitatem electus extitit, et venit ad urbem coram eodem Innocentio, suisque fratribus cardinalibus, et aliis multis praesentibus, ligium homagium in eius faciens manibus, innovavit. Deinde cum in Alemannia esset eidem Innocentio Papae et, ipso defuncto, bon. mem. Honorio Papae praedecessori nostro, et eius successoribus, ac ipsi Ecclesiae Romanae praesentibus imperii principibus, ac nobilibus, iuravit honores, iura et possessiones Romanae Ecclesiae pro posse suo servare ac protegere bona fide; et quod quaecumque ad manus suas devenirent, sine difficultate restituere procuraret, nominatis expresse dictis possessionibus in huiusmodi iuramento, quod postmodum confirmavit, coronam imperii iam adeptus, horum trium iuramentorum temerarius extitit violator, et transgressor, non sine prodicionis nota, et laesae crimine maiestatis. Nam contra praefatum praedecessorem nostrum Gregorium, et fratres suos cardinales commonitorias litteras eidem fratribus destinare, ac dictum Gregorium apud fratres ipsos, sicut apparet per litteras ab eodem tunc directas eidem, et etiam prout fertur, per universum fere orbem terrarum multipliciter diffamare praesumpsit; ac venerabilem fratrem nostrum Othonem Portuensem tunc Sancti Nicolai in Carcere Tulliano diaconum cardinalem, et bon. mem. Iacobum Praenestinum episcopum Apostolicae Sedis legatos, nobilia, et magna Ecclesiae Romanae membra personaliter

Seipsum crimine portarii se devinxit.

Sacramento oratorum opera ad sacienda Ecclesiae damna se devinxit Fredericus.

Obiecta ipsi a Pontifice captia.

capi fecit, et bonis omnibus spoliatus, ac per diversa loca non semel ignominiose deductos et circumductos, carceribus mancipari.

Concessam Christo Pontifici auctoritatem negavit.

§ 6. Privilegium insuper, quod B. Petro, et successoribus eius in ipso tradidit Dominus Iesus Christus, videlicet: Quodcumque ligaveris super terram, erit ligatum et in caelis, et quodcumque solveris super terram, erit solutum et in caelis; in quo auctoritas et potestas Romanae Ecclesiae consistit, pro viribus diminuere, vel ipsi Ecclesiae auferre satagit, scribens se praefati Gregorii Papae praedecessoris nostri non vereri latam ab eo excommunicationis sententiam in ipsum; et non solum contemptis clavibus Ecclesiae non servandam, verum etiam per se, ac officiales suos, et illam et alias excommunicationis vel interdicti sententias, quas idem omnino contempsit, cogendo et compellendo alios non servare.

Pontificiam ditionem occupavit.

§ 7. Possessiones quoque praefatae Ecclesiae Romanae, videlicet, Marchiam, ducatum Beneventanum, cuius muros et turres dirui fecit, ac alias, quas in Tusciae et Lombardiae partibus, et quibusdam aliis obtinebat locis, paucis exceptis, occupare non metuens, eas detinet adhuc occupatas. Et tanquam ei non sufficeret, quod manifeste contra iuramenta praemissa praesumendo talia veniebat, per se, vel per suos officiales, earundem possessionum homines deierare compulit, ipsos a iuramentis fidelitatis, quibus tenebantur ratione Ecclesiae, de facto, cum de iure non posset, absolvens, et faciens eosdem fidelitatem nihilominus abiurare praedictam, sibi que fidelitatis huiusmodi iuramenta praestare.

Iurata cum Gregorio pacis leges violavit.

§ 8. Pacis vero ipsum violatorem existere plane constat: quia cum olim tempore pacis inter ipsum, et Ecclesiam reformatae iurasset coram bonae mem. I.... de abbatibus Villa, episcopo Sabinensi, et magistro Thomasio tunc temporis S. Sabinae presbytero cardinali, praesentibus

eum multis aliis praelatis, principibus, et baronibus, quod staret, et pareret praecise absque ulla conditione omnibus mandatis Ecclesiae super his, pro quibus erat vinculo excommunicationis ascriptus, causis excommunicationis expressis per ordinem coram eo. Tunc temporis etiam omnibus Theutoniae hominibus, regni Siciliae, ac quibuslibet aliis cuiuscumque conditionis, aut status, qui Ecclesiae contra eum adhaeserant, omnem remittens offensam et poenam, et quod in nullo tempore offenderet, vel offendi faceret ipsos, pro eo quod Ecclesiae astiterant, praestari in anima sua per comitem Acerarum faciens iuramentum; postmodum pacem et iuramenta huiusmodi nequam erubescens irretiri periuriis, non servavit. Nonnullos enim etiam ex ipsis hominibus praedictis tam nobiles, quam alios postea capi et incarcerari fecit, et eis bonis suis omnibus spoliatis, uxores eorum et filios captivari, ac insuper terras Ecclesiae contra promissionem, quam idem I. Sabinensi episcopo et Thomasio cardinali fecerat, irreverenter invasit: ipsi ex tunc in eundem praesentem, si ullo modo praedictis articulis, aut conditionibus contraveniret, excommunicationis sententiam promulgaverunt.

Siculum Siciliae oppressit.

§ 9. Et cum idem, apostolica auctoritate sibi commissa, ipsi mandassent, ut ne per se, nec per alium impediret, quin postulationes, electiones, et confirmationes Ecclesiarum et monasteriorum in regno praefato libere de caetero fierent, secundum statutum concilii generalis, et quod nullus deinceps in eodem regno, viris ecclesiasticis, ac bonis, aut rebus eorum imponeret tallias vel collectas, quodque nullus ibidem clericus, vel persona ecclesiastica de caetero in civili vel criminali causa conveniretur coram iudice saeculari, nisi super feudis quaestio civilis haberetur, ac Templariis, Hospitalariis, et aliis personis ecclesiasticis de damnis et iniuriis irrogatis eidem satisfaceret competenter, ipse mandatum

huiusmodi adimplere contempsit. Liquebat namque undecim, aut plures archiepiscopales, et multas episcopales sedes, abbatias quoque et alias Ecclesias ad praesens in regno vacare praedicto, easque procurante ipso, sicut aperte patet, fuisse diutius praelatorum regimine destitutas in grave ipsarum praeiudicium et periculum animarum multarum. Et licet forte in aliquibus eiusdem regni Ecclesiis electiones sint a capitulis celebratae, quia tamen per illa eadem familiares clerici sunt electi, probabili potest argumento concludi, quod facultatem non habent liberam eligendi. Ecclesiarum autem ipsius regni non solum facultates, et bona fecit, prout voluit, occupari; sed et cruces, calices, thuribula, et alios sacros earum thesauros, et pannos sericos velut cultus divini contemptor, auferri, licet, ut dicitur, ipsis Ecclesiis, exacto tamen prius pro eis certo pretio, in parte fuerint restituti. Clerici quippe collectis et talliis multipliciter affliguntur, non solum trahuntur ad iudicium saeculare, sed, ut asseritur, coguntur subire duella, incarcerantur, occiduntur et patibulis cruciantur, in confusionem et opprobrium ordinis clericalis. Praefatis autem Templariis, Hospitalariis, et personis ecclesiasticis, non est de damnis illatis eisdem, et iniuriis satisfactum.

Sacrilegi sceleris iniquitatem

§ 10. Eum quoque certum est sacrilegi esse perpetratores: nam cum praefati Portuensis et Praenestinus episcopi, et quamplures Ecclesiarum praelati, et clerici, tam religiosi, quam saeculares ad Apostolicam Sedem, pro celebrando concilio, quod prius ipse petiverat convocari, per mare venient, viis omnibus terrae ipsius, de mandato eius omnino praeculis, idem destinato Hensio filio suo cum multitudine galeiarum, et per alias quamplures longe ante serio praeparatas in partibus Tusciae maritimis insidiis positas contra eos, ut gravius posset virus vomere praconceptum, ipsos quis sacrilego capi fecit, quibusdam prae-

latorum ipsorum, et aliis in huiusmodi captione submersis, nonnullis etiam interemptis, et aliquibus hostili insecutione fugatis; reliquis autem bonis spoliatis omnibus, et de loco ad locum in regno Siciliae opprobriose deductis, et circumductis, ac ibidem diris carceribus mancipatis, quorum aliqui macerati squaloribus et inedia pressi miserabiliter defecerunt.

§ 11. Merito insuper contra eum de haeretica pravitate suspicio est exorta, cum postquam excommunicationis sententiam a praefatis I. Sabinensi episcopo et Thomasio cardinali prolatam incurrerit, et praedictus Gregorius Papa ipsum anathematis vinculo innodaverit, ac post Ecclesiae Romanae cardinalium, praelatorum et clericorum, ac aliorum etiam diversis e partibus ad Sedem Apostolicam venientium captionem claves Ecclesiae contempserit et contemnat, sibi faciens celebrari, vel potius quantum in eo est, prophanari divina: et constanter asseruit, ut superius est narratum, in se praefati Gregorii Papae sententias excommunicationis non vereri.

§ 12. Praeterea coniunctus Saracenis amicitia detestabili, nuncios et munera pluries destinavit eisdem, et ab eis vicissim cum honorificentia et hilaritate recepit, ipsorumque ritus amplectitur, illos in quotidianis eius obsequiis notabiliter secum tenens: eorumdem etiam more uxoribus, quas habuit, de stirpe regia descendentes, eunuchos praecipue, quos, ut dicitur, serio ipse castrari fecerat, non erubuit deputare custodes. Et quod execrabilius est, olim existens in partibus transmarinis, facta compositione quadam, imo verius collusionem cum Soldano Mahometi nomine, in templo Domini diebus ac noctibus publice proclamari permisit. Et nuper nuncios Soldani Babiloniae postquam idem Soldanus Terrae Sanctae, ac christianis habitatoribus eius per se ac suos damna gravissima, et inestimabiles iniurias irrogarat, fecit

Iusta haeresis suspitione aspersus.

Saracenis, hostibusque religionis iunctus foedere.

per regnum suum Siciliae cum laudibus ad eisdem Soldani extollentiam, sicut fertur, honorifice suscipi, et magnifice procurari.

Bavariae ducis occisor, Battacio scilicet filiam dedit in uxorem.

§ 13. Aliorum quoque infidelium perniciosos et horrendis obsequiis contra fideles abutens, et illis, qui damnabiliter vilipendentes et contemnentes Apostolicam Sedem ab unitate Ecclesiae discesserunt, procurans affinitate ac amicitia copulari, clarae memoriae ducem Bavariae specialem Ecclesiae Romanae devotum fecit, sicut pro certo asseritur, christiana religione despecta, per assassinos occidi: et Battacio, Dei et Ecclesiae inimico, a communione fidelium per excommunicationis sententiam cum adiutoribus, consiliatoribus, et fautoribus suis solemniter separato, filiam suam traduxit in uxorem: catholicorum vero principum actus et mores respuens, neglecta salutis suae etiam integritate, pietatis operibus non intendit, quinimo ut de suis nefariis dissolutionibus sileamus, cum didicerit tantum opprimere, non curat oppressos iniuriis relevare, manu eius, ut decet principem christianum, ad elemosynas non extensa, cum destructioni Ecclesiarum desiterit, et religiosas, ac ecclesiasticas iugi attriverit afflictione et persecutione personas: nec enim ecclesias, nec ulla monasteria, nec hospitalia, seu alia pia loca cernitur usquam construxisse aut fundasse. Num igitur haec non levia, sed efficacia sunt argumenta de suspitione haeresis contra eum? Cum tamen haeticorum vocabulo eos ius civile contineri asserat, et latis adversus eos sententiis debere succumbere, qui vel levi argumento, ac iudicio catholicae religionis, et tramite detecti fuerint, deviare.

Debitum pro regno Siciliae vectigal non solvit.

§ 14. Praeter haec regnum Siciliae, quod est speciale patrimonium B. Petri, quod idem princeps ab Apostolica Sede tenebat in feudum, iam in tantam in clericis et laicis exinanitionem servitutemque redegit, quod eis pene penitus

nihil habentibus, et omnibus exinde fere probis eiectis et expulsis, illos qui remanserunt ibidem, sub servili quasi conditione vivere, ac Romanam Ecclesiam, cuius principaliter sunt homines et vassalli, offendere multipliciter, et hostiliter impugnare compellit. Posset etiam merito reprehendi, quod mille squifatorum annuam pensionem, in qua pro eodem regno ipsi Romanae Ecclesiae tenetur, per novem annos et amplius solvere praetermisit.

§ 15. Nos itaque super praemissis, et quampluribus aliis nefandis et execrandis excessibus ac flagitiis cum fratribus nostris cardinalibus, et sacrosancto concilio, deliberatione praehabita matura et diligenti, cum Domini nostri Iesu Christi vices, licet immeriti teneamus, in terris, nobisque in beati Petri persona sit dictum: Quodcumque ligaveris super terram erit ligatum et in caelis etc., memoratum principem qui se imperio et regnis, omnique denique honore ac dignitate reddidit tam indignum, quique propter suas iniquitates atque scelera a Deo, ne regnet vel imperet, est abiectus, suis ligatum peccatis, a Deo abiectum, omnique honore ac dignitate privatum a Domino ostendimus, ac denunciamus, et nihilominus sententiando privamus; omnesque, qui ei iuramento fidelitatis aliquo modo tenentur astricti, vel obligati, a iuramento huiusmodi perpetuo absolvimus et liberamus, auctoritate apostolica firmiter et strictim inhibendo, ne quisquam de caetero sibi tamquam imperatori, vel regi pareat, vel quomodolibet parere intendat; decernendo quoslibet, qui deinceps velut imperatori, vel regi consilium vel auxilium praestiterint, seu favorem, ipso facto excommunicationis vinculo subiacerent: illi autem ad quos in eodem imperio, imperatoris spectat electio, eligant libere alium in eius locum successorem. De praefato vero Siciliae regno providere curabimus, cum eorum-

Iure imperii et regni privatur.

Vassallicis iuramento solvantur adolentibus.

dem fratrum nostrorum cardinalium consilio, sicut viderimus expedire.

Datum Lugduni, decimo sexto kalendas augusti, pontificatus nostri anno tertio.

Dat. die 17 iulii 1245, pontif. anno III.

VII.

Portugalliae rege regno deturbato propter inhabilitatem, regni proceres monentur, ut comiti Bolonien. ipsius regis fratri obediant, salvo tamen eiusdem regis, eiusque filiorum iure (1).

SUMMARIUM

Exordium. — Causae regis deponendi. — A Gregorio Papa censuris innodatus. — Monitus promissis non stat. — Damna per eius negligentiam regni Ecclesiis illata; — Et religioni. — Eius desidia in regni rebus. — Iteratis Papae litteris monitus, et episcoporum libellis. — Processu itaque super his confecto: — Regni proceres adhortatur Innocentius, ut comiti Bolonien. regis fratri obedientiae iuramentum praestent: — Salvo eiusdem regis, eiusque filiorum iure.

Innocentius episcopus servus servorum Dei, dilectis filiis baronibus, communitatibus, consiliis tam civitatum, quam castrorum, et aliorum locorum, ac universis militibus et populis per regnum Portugalliae constitutis, salutem et apostolicam benedictionem.

Exordium

Grandi non immerito exultamus in Domino gaudio, cum christianae professionis regna sic salubri diriguntur statu, quod Ecclesiae, ac alia loca cultui et obsequio deputata divinis, et personae ecclesiasticae, caeterique fideles ipsorum pacis tranquillitate laetantur, fides in eis catholica maiori continue robore convalescit, servatur inibi iustitia, et audacia cunctis ibidem interdicitur. Vehementi autem dolore turbamur, si quando regna ipsa, quod absit, procurante humani generis inimico, scinduntur discordiis, circa

(1) Ex Regest. Vatic.

fidei cultum remisso devotionis ardore tepescunt, iustitiam negligunt, et in se ipsis permittunt illicita perpetrari. Unde multa sollicitudine magnoque studio procurare nos convenit, ut christianorum regna, quae in statu sunt prospero, incommutabiliter in illo regantur, et quae periculoso ruere dignoscuntur, reformatione laudabili reparentur. Sane cum charissimus in Christo filius noster... Portugalliae rex illustris a pueritia sua, clarae memoriae patre suo viam universae carnis ingresso, regni Portugalliae gubernatione suscepta, Ecclesias et monasteria existentia in eodem, pravo usus consilio, in gravem Dei offensam et conculcationem ecclesiasticae libertatis, multimodis exactionibus et oppressionibus per se, suosque immaniter afflixisset, et ab aliis pro ipsorum libito libere permisisset affligi; tandem quibusdam Ecclesiarum praelatis eiusdem regni apud Romanos Pontifices praedecessores nostros querelas multiplices super his deponentibus contra eum, felicitis recordationis Gregorius Papa praedecessor noster post huiusmodi querelas et admonitiones frequentes regi propter hoc factas eidem, ac expectationes diutinas, necnon et interdicti ac excommunicationis sententias ob ipsius contumaciam in eum, et praefatum regnum auctoritate apostolica promulgatas, diuque observatas ibidem super certis praedictae libertatis articulis, et quibusdam aliis ab eo et suis impostum observandis, et satisfactione impendenda monasteriis et Ecclesiis de damnis ac iniuriis per ipsum et suos irrogatis eisdem, ac ipsorum defensione duxit salubriter providendum, certis executoribus, qui eum ad hoc ecclesiastica censura compellerent, deputatis. Sed idem, receptis apostolicarum provisionum litteris, licet promiserit per suas patentes litteras, quod articulos contentos in earumdem provisionum litteris et observaret et faceret a suis subditis observari; postmodum tamen non solum praefatis

Causae regis deponendi

A Gregorio Papa censuris innodatus.

Monitus promissis non stat

Damna per eius negligentiam regni Ecclesiis illata.

Et religioni.

monasteriis et Ecclesiis de praemissis damnis et iniuriis satisfacere, vel ea defensare neglexit; sed etiam, ut accepimus, Ecclesias et monasteria ipsa per se, suosque portarios et meyrinos collectis, procurationibus ac exactionibus indebitis intolerabiliter aggravavit et aggravat incessanter, ac circa malefactorum regni eiusdem insolentiam reprimendam sic negligens invenitur, quod in eodem regno bona tam ecclesiastica, quam mundana per raptos, praedones, invasores, incendiarios, publicos sacrilegos et detestabiles homicidas abbatum videlicet, priorum et aliorum religiosorum et clericorum saecularium, ac laicorum etiam occisores, deperire propter saecularis defectum iustitiae dignoscuntur. Unde quia sic in eodem regno a quibuslibet suis subditis impune delinquitur, barones, alique ipsius regni nobiles et ignobiles, sumpto ex hoc delinquendi ausu, matrimonia contrahere in gradu prohibito, bona ecclesiastica rapere, ac alia quamplura mala olim a bonae memoriae Ioanne Sabinen. episcopo tunc in partibus illis Apostolicae Sedis legato, sub anathematis interminatione prohibita committere non verentur, et tam ipsi, quam plures alii de regno praefato diversarum excommunicationum innodati laqueis per deviam desperationis errantes in contemptum clavium divinis se officiis irreverenter ingerunt, et ecclesiasticis sacramentis, ac in subversionem Catholicae Fidei plures eorum de ipsius articulis auctoritates tam novi, quam veteris Testamenti temere, non sine fermento pravitate haereticae, in suarum et aliorum animarum periculum exponendo, eo dissimulante, non metuunt disputare: et nonnulli de regno ipso Ecclesiarum et monasteriorum patroni, ac alii asserentes se patronos, cum non sint, locorum ipsorum et ab eis illegitime geniti, in bonis dictarum Ecclesiarum et eorumdem monasteriorum crudeliter debacchantes, Ecclesias ipsas et monasteria eadem ad tantam inopiam redegerunt,

quod eis nequeuntibus proprios sustentare ministros, quin imo aliquibus ex ipsis servitorum solatio destituta, et aliorum claustris, refectoriis, caeterisque officinis, equorum stabulis et postribulis quarumlibet personarum vilium deputatis, divini nominis, et religionis cultus exinde penitus est sublatus bonis illorum omnibus in direptionem expositis et in praedam. Caeterum castra, villas, possessiones et alia iura regalia, idem rex propter ipsius desidiam, sui que cordis imbecillitatem deperire permittens, ac passim et illicite malignorum acquiescens consiliis, alienans tam ecclesiasticarum, quam saecularium personarum nobilium et ignobilium occisiones nefarias, dum religioni non parcitur, nec sexui, vel aetati, rapinas, incestus, raptusque monialium et saecularium mulierum, rusticorum ac negotiatorum tormenta gravia, quae ipsis a nonnullis regni praefati pro extorquenda ab ipsis pecunia infliguntur; Ecclesiarum et cimiteriorum violationes et incendia, fractiones treugarum et alia aenormia, quae a sibi subiectis libere committuntur, scienter tolerat, quin potius tot, tantisque malis, dum ea praeterit impunita, consentire videtur, et pandit aditum ad peiora. Terras insuper et alia christianorum bona in confinio Saracenorum posita non defendens, ea infidelibus devastanda, seu etiam occupanda ex animi pusillanimitate relinquit. Et licet a supradictis praelatis, ut ad corrigenda praemissa, pluraque alia nefanda, quorum seriosa narratio fastidium generaret, ardentem, ut tenetur, assurgeret, monitus fuerit diligenter, idem tamen, eorum monitionibus obauditis, id efficere non curavit; propter quod nos episcoporum, abbatum, priorum et aliorum tam religiosorum, quam saecularium regni eiusdem conquestionibus et clamoris insinuationibus excitati, regem ipsum per nostras litteras, ut praemissa corrigeret rogandum duximus attente, et hortandum venerabilibus fratribus nostris Co-

Eius desidia in regni rebus.

Iteratis Papae litteris monitus, et episcoporum libellis

Processu
que super
hinc
collecto:

Regni proces-
sus adhortatur
Innocentius, ut
comiti Bolo-
niensi regia
fratri obedientie
iuramentum
praesentent.

limbrien., ac Portugallen, episcopis, ac priori praedicto Colimbrien., nihilominus per alias litteras iniungentes, ut eum ad hoc ex parte nostra monentes attente, ac efficaciter inducentes, qualiter super hoc faciendum duceret, et de ipsorum cura cum in hac parte processu nos in concilio certificare curarent. Cum igitur per dictos Colimbrien. et Portugallen. eiusdem concilii tempore apud Sedem Apostolicam constitutos, ac ipsorum et dicti prioris litteras, quod praefatum regem super his diligenter monuerint, et tam per eosdem, quam per alios fide dignos, necnon multorum virorum ecclesiasticorum, communitatum, baronum, militum, ac etiam nobilium dominorum litteras, quod praemissa nullatenus emendantur, sed potius de die in diem graviora propter eius desidiam et negligentiam praesumuntur. Quodque in subversionem regni praefati vassalli eiusdem regis, congregata multitudine armatorum, castra ipsius noviter expugnare omniaque occurrentia invadere, devastare, praedari, et alia mala, eo haec ex torpore nimio tolerante committere, divino timore posthabito, non formidant, nobis satis liquido innotescat. Cupientes regnum ipsum tot tribulationum adversitate depressum, maxime cum sit Romanae Ecclesiae censuale, alicuius prudentis et providi diligentia et industria relevari, universitatem vestram de fratrum nostrorum consilio monemus, rogamus et hortamur attente per apostolica vobis scripta districte praecipiendo mandantes in remissionem vestrorum peccaminum iniungendo, quatenus dilectum filium nobilem virum comitem Bolonien. praefati regis fratrem, de devotione, probitate ac circumspectione multipliciter commendatum, qui eidem regi, si absque legitimo decederet filio, iure regni succederet, quique ex innatae dilectionis affectu, quo vos, et praedictum regnum prosequitur, magnanimitate ac potentia sibi plurimum suffragantibus regnum ipsum reformaturus, firma credulitate spe-

ratur, praesertim cum ad curam et administrationem generalem et liberam regni eiusdem, non minus pro saepedicti regis, quam ipsius regni utilitate, si provide attendatur, ac ad defensionem Ecclesiarum, monasteriorum, aliorumque piorum locorum regni praefati, et personarum ecclesiasticarum tam religiosarum, quam saecularium, necnon viduarum, orphanorum et caeterorum ibidem degentium, ac deperditorum iuribus recuperationem salubriter in Domino confidimus sit assumptus, cum ad vos accesserit, fidelitate, homagio, iuramento, seu pacto, si aliquibus forte praefato regi, vel cuicumque alii personae tenemini, aut etiam ipsius regis prohibitione, dummodo personam eius, et vitam, ac legitimi sui filii, si aliquem ipsum habere contigerit, fideliter conservetis, debitum eis exhibentes honorem nequaquam obstantibus in civitatibus, castris, villis et munitionibus regni praedicti cum omnibus suis recipere, ac eius dispositioni, ordinationi et mandatis universaliter singuli et singulariter universi per omnia et in omnibus intendere, absque difficultate qualibet procuretis, impendentes sibi contra quoslibet repugnantes, ac etiam violentes, consilium, auxilium et favorem de redditibus, proventibus, omnibusque saepefati regni iuribus sine diminutione aliqua plenarie respondendo, ut de illis dicto regi secundum quod suam decet excellentiam, et sibi, ac suis et praefati regni necessitatibus pro temporum, ac negotiorum emergentium qualitate valeat providere. Alioquin venerabilibus fratribus nostris Bracharen. archiepiscopo et episcopo Colimbrien. damus nostris litteris in praecipitis, ut vos ad id modo praemisso per censuram ecclesiasticam, appellatione remota, compellant. Per hoc autem non intendimus memorato regi, vel ipsius legitimo filio, si quem habuerit, praedictum regnum adimere, sed potius sibi et eidem regno destructioni exposito, ac vobis ipsis in vita eiusdem regis per sollicitu-

Salvo eiusdem
regis, eiusque
aliorum iure.

dinem et prudentiam comitis consulere supradicti.

Datum Lugduni octavo kalendas augusti, pontificatus nostri anno tertio.

Dat. die 25 iulii 1245, pontif. anno III.

VIII.

Brugnatensi et Naulensi Ecclesiis, quae antea fuerant unitae, dignitas redditus episcopalis: Naulensi autem annectitur monasterium Sancti Eugenii prope hanc civitatem situm (1).

SUMMARIUM

Has Ecclesias antea unitas separat. — Naulensi Ecclesiae monasterium S. Eugenii unitur. — Clausulae.

Innocentius episcopus servus servorum Dei, Bruniacensi, et Naulensi electo, et capitulo Naulensi.

Has Ecclesias
antea unitas se-
parat.

Cum olim te, fili electe, ad regimen Ecclesiae Bruniacen. assumpto, bonae memoriae episcopus Praenestinus tunc in Franciam in legationis officio proficiscens de speciali mandato felicis recordationis Gregorii Papae praedecessoris nostri, facto sibi ad instantiam communis Ianuensis, Brumacen. et Naulen. Ecclesias duxerit uniendo, ita quod utraque esset Ecclesia cathedralis, et unus et idem diceretur episcopus utriusque, fueruntque adeo invicem Ecclesiae ipsae remotae, quod per unum episcopum ambae nequeunt gubernari, nec ad sustentationem episcopi Naulensis Ecclesiae sufficientes facultates; nos easdem Ecclesias de fratrum nostrorum consilio separantes et statuentes quodammodo, ut utraque proprio praesule gubernetur, remaneatque Naulensis Ecclesia suffraganea Ecclesiae Ianuensis, tibi, fili electe, retinendi unam ex Ecclesiis ipsis, quam volueris liberam concedimus facultatem, procuracionem alterius,

(1) Ex Ughell., Ital. Sac., tom. IV, ubi de episcopis Brugnatens.

a cuius vinculo te absolvimus, tuae sollicitudini tam in spiritualibus, quam in temporalibus usque ad nostrum beneplacitum committentes: et quia redditus mensae Naulensis episcopi sunt tenues et exiles, precibus dilectorum filiorum potestatis, consilii et communis Ianuensis inclinati, monasterium Sancti Eugenii situm in Insula iuxta civitatem Naulensem Sedi Apostolicae censuale praedictae mensae auctoritate praesentium de eorumdem fratrum consilio duximus annectendum, cui praesit Naulensis episcopus, qui pro tempore fuerit, tamquam abbas; abbati vero ipsius monasterii, qui nunc praesit, iuxta voluntatem et arbitrium venerabilis fratris nostri archiepiscopi Ianuensis et ipsius abbatae de bonis eiusdem monasterii congrua portio, donec de ipso abbate aliter ordinandum duxerimus, assignetur.

Naulensi Ec-
clesiae mona-
sterium S. Eu-
genii unitur.

Clausulae.

Nulli ergo omnino hominum liceat hanc nostrae constitutionis et concessionis paginam infringere, vel ei ausu temerario contraire. Si quis autem hoc attentare praesumpserit, indignationem omnipotentis Dei et beatorum Petri et Pauli apostolorum eius se noverit incursum.

Datum Lugduni idibus augusti, pontificatus nostri anno tertio.

Dat. die 13 augusti 1245, pontif. anno III

IX.

Explicatio nonnullorum capitum regularum fratrum ordinis Minorum S. Francisci (1).

SUMMARIUM

Exordium. — De admittendis in ordine. — De officio divino celebrando. — Quomodo se gerere debeant in receptione pecuniarum. — De cura infirmorum, et fratrum vestuario. — Declaratur, usum rerum quarumlibet convenire fratribus, omni secluso dominio etiam in communi: — Sed totale

(1) Ex Waddingo, nov. edit., ad annum 1248, § XVIII. — Alias Minoritarum regulam a Gregorio IX explicatam vidimus, Constit. XXII, hoc in tom., pag. 449.

dominium ad Sedem Apostolicam spectare. — In publicis tantum et manifestis peccatis ad ministros recurrendum. — Institutio custodis custodum ad capitulum generale, qui vice aliorum suffragetur. — De institutione praedicatorum. — De ingressu monasteriorum montalium. — Clausulae.

Innocentius episcopus servus servorum Dei, dilectis filiis generali, et provincialibus, ac custodibus, caeterisque fratribus ordinis Fratrum Minorum, salutem et apostolicam benedictionem.

Exordium.

Ordinem vestrum illo prosequentes affectu, quod ipsum inter alios laudabilibus continue proficere incrementis ferventer optemus; libenter ea, per quae oportuni vigor accipiat fulcimentum, paternam sollicitudine procuramus.

Hinc est, quod cum quaedam dubia, et obscura, quae in vestra regula continentur, animos vestros cuiusdam confusione implicitatis involvant, et nodosae intricacionis difficultate impediunt intellectum; et felicis recordationis Gregorius Papa praedecessor noster aliqua ex eis exposuerit, et declaraverit semiplene: nos obscuritatem ab illis perfectae interpretationis declaratione omnino amovere volentes; et ambiguitatis scrupulum cura ipsa de vestris cordibus plenioris expositionis certitudine penitus amputare: dicimus, quod per eandem regulam quoad observationem Evangelii, quam iniungit, non nisi ad ea dumtaxat Evangelii consilia tenemini, quae in ipsa regula praeceptorie, vel inhibitorie sunt expressa. Licet autem ministris provincialibus, tam eorum vicariis, quam aliis providis fratribus venientium ad ordinem receptionem pro suis provinciis, de consilio fratrum committere discretorum; non tamen expedit conveni volentes indifferenter admitti, sed illos tantum, qui suffragantibus eis litteratura, et aliis laudabilibus circumstantiis, possint utiles esse ordini, sibi que per vitae meritum, et aliis proficere per exemplum. Sic vero ministri egressos ab ordine cum redierint,

De admittendis in ordinem.

ad ipsum recipiant, et eiiciant in certis casibus, secundum terminationem vestri generalis capituli, iam receptos. Quamquam vero praedicta contineat regula, quod clerici faciant divinum officium secundum ordinem Sanctae Romanae Ecclesiae, excepto Psalterio, ex quo habere poterunt Breviaria: cum tamen divino intersunt officio, cum aliis celebrantes, tunc eis illud sufficit; et ad dicendum officium proprium non tenentur. Et licet in eadem regula sit prohibitum, ne fratres recipiant per se, vel per alios denarios, vel pecuniam ullo modo: possunt tamen, si rem sibi necessariam aut utilem velint emere, vel solutionem facere pro iam emptam, vel nuntium eius, a quo res venditur, vel aliquem alium volentibus sibi eleemosynam facere; nisi eidem per se, vel per proprios nuntios solvere maluerint, praesentare: et taliter praesentatus a fratribus non est eorum nuntius, licet praesentetur ab ipsis, sed illius potius cuius auctoritate solutionem facit, seu recipientis eandem: et ad ipsum (si soluto emptae rei pretio, de huiusmodi eleemosyna remaneat aliquid apud eum) possunt etiam fratres pro suis necessitatibus, vel commodis licite habere recursum. Si vero pro aliis fratrum necessitatibus aut commodis nominetur aliquis, vel praesentetur ab eis, potest ille commissam sibi eleemosynam, sicut dominus conservare, vel apud spiritualem, vel familiarem amicum fratrum nominatum vel non nominatum ab ipsis deponere, per eum loco et tempore, pro ipsorum necessitatibus, vel commodis, sicut fratres expedire viderint, dispensandam, seu etiam ad personam, vel loca alia transferendam: ad quos etiam fratres pro huiusmodi necessitatibus, seu commodis sana conscientia recurrere poterunt, maxime si negligentes fuerint, vel necessitates, aut incommoda ignoraverint eorumdem. Et taliter nominati vel praesentati a fratribus, non sunt eorum nuntii, seu depositarii, sed

De officio divino celebrando.

Quomodo se gerere debeant in receptione pecuniarum.

illorum a quibus pecunia, vel denarii committuntur; nec fratres per se, vel per interpositas personas, denarios, vel pecuniam recipiunt nominando aut praesentando si (1) aliquos, seu ad huiusmodi nominatos vel praesentatos taliter recurrendo; cum non sit intentionis eorum, ut de ipsorum auctoritate huiusmodi denarii, vel pecunia conserventur, aut ab eis nomine depositi exigantur, licet nunciis vel depositariis ipsis committantur pro necessitate, vel commodo eorumdem. Et cum in dicta regula subiungatur, quod pro necessitatibus infirmorum, et aliis fratribus induendis, per amicos spirituales ministri tantum et custodes sollicitam curam gerant, debent alii fratres curam huiusmodi, quae praefatis ministris et custodibus ex regula praecipue incumbit, cum sibi ab illis commissa fuerit, gerere diligenter. Dicimus insuper, quod cum in ipsa contineatur expresse, quod fratres nihil sibi approprient, nec domum, nec locum, nec aliquam rem, nec in communi, neque in speciali debent proprietatem habere, sed locorum, et domorum, ac utensilium, et librorum et eorum mobilium, quae licet habere, ordo usum habeat: et fratres, secundum quod generalis, vel provincialis ministri disponendum duxerint, eis utantur. Nec vendi debent loca, domus, vel mobilia huiusmodi, seu extra ordinem commutari, aut alienari quoquo modo, a quibuscumque personis ad usum fratrum donata, vendita, permutata, seu quocumque iusto modo, vel translata sunt, vel fuerint, nisi Apostolica Sedes, vel Ecclesiae Romanae cardinalis, qui pro tempore fuerit ordinis gubernator, generali, seu provincialibus ministris auctoritatem super hoc praebuerit, vel assensum; cum tam immobilium, quam mobilium huiusmodi ius, proprietas et dominium (illis solis exceptis, in quibus expresse donatores seu translatores sibi proprietatem et dominium reservasse constiterit) nullo

De cura infirmorum, et fratrum vestiarum.

Declaratur, utrum reum quarumlibet convenire fratribus omni secluso dominio etiam in communi.

(1) Leg. fors. etc.

modo ad Ecclesiam ipsam spectent: cui domus et loca praedicta cum ecclesiis et caeteris suis pertinentiis (quae omnia in ius et proprietatem beati Petri suscipimus) omnino tam in spiritualibus, quam temporalibus immediate subesse noscuntur. De vilibus autem mobilibus, vel parum valentibus liceat fratribus pietatis seu devotionis intuitu, vel pro alia honesta et rationabili causa (obtentam prius super hoc superiorum suorum licentiam) extra ordinem aliis largiri. Illud quoque regulae praedictae capitulum ubi dicit: Ut si qui fratrum, instigante humani generis inimico, mortaliter peccaverint, pro illis peccatis, de quibus ordinatum fuerit inter fratres, ut recurratur ad solos ministros provinciales, teneantur praedicti fratres ad eos recurrere, quam citius poterunt sine mora; ad manifesta tantum, et publica pertinet: possunt tamen iidem ministri pro fratrum laboribus, et periculosis discursibus evitandis, si expedire viderint, custodibus et aliis discretis fratribus presbyteris super iis committere vices suas. Volumus autem, ut ipsi ministri constituent, vel constitui faciant tot per provincias, quot ad hoc necessarios noverint de maturioribus et discretioribus fratribus sacerdotibus, qui super huiusmodi peccatis cum occulta, vel privata fuerint, audiant poenitentes, nisi ministris aut custodibus suis ad loca eorum declinantibus maluerint confiteri: at pro eo quod in regula dicitur, ut decedente generali ministro, a provincialibus ministris et custodibus in capitulo Pentecostes fiat electio successoris; dicimus, quod singularum provinciarum custodes unum ex se constituent, quem cum suo provinciali ministro pro ipsis ad capitulum dirigant, voces suas committentes eidem. Et cum iuxta regulae praefatae tenorem nulli fratrum liceat populo praedicare, nisi a ministro generali fuerit examinatus et approbatus, et sibi officium praedicationis ab ipso concessum: potest idem minister vices suas ministris

Sed totale dominium ad Sedem Apostolicam spectare.

In publicis tantum et manifestis peccatis ad ministros recurrendum.

Institutio custodis custodum ad capitulum generale, qui vice aliorum suffragetur.

De institutione
praedicatorum.

provincialibus, et eorum vicariis committere in hac parte, ita tamen, ut ipsi provinciales, vel iidem vicarii in ipsorum provincialium absentia, una cum diffinitoribus, in provincialibus capitulis fratres suarum provinciarum, quos examinatione indigere credunt, examinent, approbent: eisque huiusmodi officium, prout secundum Deum viderint expedire, concedant. Si qui vero examinari non egent: pro eo quod in theologiae facultate, et praedicationis officio sunt instructi: si aetatis maturitas, et alia, quae requiruntur in talibus conveniant in eisdem, possunt de generalis, vel suorum provincialium ministrorum licentia, seu mandato, populo praedicare. Per id autem quod in eadem regula continetur, quod fratres non ingrediantur monasteria monacharum praeter illos, quibus a Sede Apostolica concessa fuerit licentia specialis; dicimus ingressum in monasteria tantummodo monialium inclusarum ordinis Sancti Damiani prohibitum fore ipsis: ad quae nemini licet ingredi, nisi ei a Sede Apostolica facultas super hoc specialiter tribuatur. Et nomine monasterii claustrum, domos, officinas interiores volumus comprehendere. Ad aliarum vero coenobia monialium possunt, sicut et alii religiosi, fratres illi ad praedicandum, vel petendum eleemosynam, aut pro aliis honestis et rationabilibus causis accedere ac intrare, quibus id a superioribus suis pro sua fuerit maturitate vel idoneitate concessum.

Clausula.

Nulli ergo omnino hominum liceat hanc paginam nostrae declarationis infringere, vel ei ausu temerario contraire. Si quis autem hoc attentare praesumpserit, indignationem omnipotentis Dei ac beatorum Petri et Pauli apostolorum eius se noverit incursurum.

Datum Lugduni decimo octavo kalendas decembris, pontificatus nostri anno tertio.

Dat. die 14 novembris 1245, pontif. anno III.

X.

Privilegium abbatis monasterii Cisterciensis, et aliorum coabbatum ordinis Cisterciensis, succedendi in bonis monachorum, in quibus ipsi successissent, si in saeculo remansissent.

Innocentius episcopus servus servorum Dei, dilectis filiis abbati Cistercii, eiusque coabbatibus, et conventibus universis Cisterciensis ordinis, salutem et apostolicam benedictionem.

Devotionis vestrae precibus inclinati, auctoritate vobis praesentium indulgemus, ut possessiones, et alia bona mobilia et immobilia (exceptis feudalibus), quae personas fratrum, ad monasteria vestra e saeculo fugientium, et professionem facientium, in eisdem, si remansissent in saeculo, ratione successionis, vel quocumque alio iusto titulo contigissent, petere ac retinere libere valeatis, contraria consuetudine non obstante.

Nulli ergo etc. Si quis autem etc.

Datum Lugduni undecimo kalendas novembris, pontificatus nostri anno quarto.

Dat. die 22 octobris 1246, pontif. anno IV.

XI.

Canonizatio beati Eadmundi Cantuariensis archiepiscopi, cum institutione festivitatis pro die 16 novembris.

SUMMARIUM

Proemium. — 1. B. Eadmundi virtutes. — 3. Miraculis clarus. — 5. Sanctorum albo adscribitur. — 6. Eius celebranda festivitas die 16 novembris. — 7. Indulgentia eius sepulchrum visitantibus.

Innocentius episcopus servus servorum Dei, venerabilibus fratribus, archiepiscopis et episcopis, et dilectis filiis abbatibus, prioribus, decanis, archidiaconis, praepositis, archipresbyteris, et aliis Ecclesiarum praelatis, ad quos litterae istae pervenerint, salutem et apostolicam benedictionem.

Novum matris Ecclesiae gaudium, novi Sancti celebritate, iucunde laeti referi-

Proemium.

mus. Grande a caelesti collegio, de collegae novi consortio, agi festum exultanti animo nunciamus. Gaudet quidem Ecclesia, se talem, ac tantum produxisse filium, qui alios sacrae conversationis exemplo dirigat, et percepto iam beatitudinis praemio, firmam spem eis tribuat de salute. Laetatur nimirum se tam clara sobole illustrata, quae digno ab omnibus attollenda praefatione, et devota veneratione colenda, manifeste declarat, ad haereditatis aeternae participium admittendos, qui ipsam matrem Ecclesiam fide ac opere profitentur, et nullos in supernam posse gloriam, nisi per eam, tamquam regni coelorum clavigeram, introire. Gaudet coelestis Patria nobilis habitatoris adventu, expertumque colonum fidei suis incolis noviter adunari. Exultant cives coelestes de celebris aggregatione concivis, de condigno coeli consorte nuper ipsis habito psallunt Sancti. Exurgite igitur et vos fidei zelatores, et una cum Ecclesia Matre nostra laetamini de magnificentia et exultatione confratris. Affluite gaudio, et spem tutam assumite de coindigena terrenorum, facto compatriota coelestium. Exultate ingenti laetitia, quod novellus vobis apud Deum patronus accrevit, qui adest coram ipso pro salute nostra placidus intercessor.

B. Eadmundi
virtutes.

§ 1. En siquidem B. Eadmundus archiepiscopus Cantuariensis salubriter pensans, ad factorem suum facturam affectu dirigi naturali, naturamque collapsam reparatorem debere recognoscere, proprium Creatorem et Redemptorem suum affectuose ac studiose quaesivit. Rectae namque intentionis lumen baiulans, ad ipsum perfectorem operum processit gressibus salutis, semitam aliis et splendore vitae ac doctrinae claritate demonstrans. Unde horum trium, intentionis purae, perfecti operis, et recti sermonis dulci concordia, velut delectabili psallens tripudio, tribus hostibus, carne, mundo, daemone, virtute perseverantiae superatis, digne meruit, verae fidei, securae

spei et fervidae charitatis ternario insinguitus, summae Trinitatis arce, trino electorum, virginum scilicet, continentium, et conjugatorum ordine praeparata palma victoriae honorari.

§ 2. Etenim ut de suis actibus aliquid dicamus, licet ipsius vita, quo plenius exponitur, eo relatoris gustui plus dulcescat, magisque delectet animos auditorum; ab annis teneris Filium Dei tenere diligens, eum postmodum tenere corde non desiit, quia ipsum tenellae mentis tabulae stylo rectae considerationis inscripsit. Quinimo quanto maiori profecit aetate, tanto pleniori cognitione in amorem eius exarsit. Et ne fervor spiritus suae carnis extingueretur ardore, sed mortificatione potius accenderetur, ipsius assidui eam asperitate cilicii edomans, eius libitum, arctae abstinentiae nexibus alligavit, ut non suo ducta voto, sed spiritus voluntate, ad licita tute pergeret, et provide ab illicitis declinaret. Nam districtis corpus maceravit ieiunium, antiquorum observantiae novorum austeritatem, quae sibi ipse idem indixerat, superaddens, dum deliciosorum ciborum oblectatione despecta, refectione contentus humilium, communium ieiuniorum temporibus a permissis etiam elegit ieiunare cibariis, et certis insuper in hebdomada diebus amplius abstinere. Somni quoque prolixitatem odiens, diuturnis vacabat vigiliis, excussoque torpore, orationi sedulo insistebat. Cubilis enim sprete mollitiae, ne requie delicata lenesceret, illam membris indulgebat iacendo quietem, ut brevi sopore refectus, protinus surgeret, seque genuflexionibus et orationibus diutius deputaret. Ab initio autem viarum suarum sic munde usque in finem incedere studuit, quod mundo vitato lubrico, in lutum non defluens voluptatis, munditiae nitore praefulsit. Quid amplius? contrivit fragile carnis vasculum, ut in eo thesaurum animae sibi creditum cautius conservaret. Doctor vero praeclarus, ac prae-

dicator eximus, et auditorum mentibus scientiae lumen infudit, et pectoribus fidelium (avulsis vitiorum tribulis) semina virtutum iniecit. Humilitate quippe sublimis, mansuetudine placidus, patientia fortis, benignitate affabilis, pietate condolens, misericordia ignoscens, et multiplici eleemosynarum irriguo in subventionem affluens egenorum. Et ut gestorum suorum multitudinem succincta relatione texamus, sic Iesum firma credulitate cognovit, et agnitum sincero corde dilexit, ac dilectum totis votis ambivit, quod mundo et eis quae in mundo sunt, penitus vilipensis, ad coelestia cunctis studiis inhiavit, satagens se suo nomini actibus coaptare, ut sicut vocabatur Eadmundus, sic se vel criminum labe mundum, vel e mundo abductum, seu extra mundi amplexus positum, operum testificatione probaret. Unde tamquam spiritualis homo, et mundus a carnis contagiis in extremis agens, et Corpus Christi sibi delatum reverenter adorans, haec verba omni attentione notanda, mira protulisse compunctione aperte monstratur: Tu es in quem credidi, quem praedicavi, quem docui. Et tu testis es mihi, quod nihil aliud, nisi te, Domine, in terra quaesivi. Sicut tu scis quod nihil volo, nisi quod tu vis, fiat voluntas tua.

§ 3. Verum cum vivens Dei Ecclesiam praeclaris illuminasset meritis, mortuus suae claritatis radios non subtraxit, sed quum functus hac vita verius viveret quam vixisset, eam postmodum illustravit fulgore luminis plenioris. Non enim voluit Dominus sanctitatem mundo supprimi tanti viri, quin, sicut pluralitate innotuerat meritorum, sic miraculorum diversitate pateret; ut qui tota ipsum devotione coluerat, iam secum regnans, venerabiliter coleretur. Nam caecis lumen restituit: et quod est gloriosius, de cuiusdam oculis innatae caecitatis tenebras infusi visus perspicuitate fugavit. Alii, cuius linguam natura diutina taciturnitate ligaverat, liberam loquendi tri-

buit, solvitque silentio, facultatem. Leprosam quamdam, squamis leprae mox decidentibus, subita et mirabili abstersione mundavit; tremula paralytici membra firmavit consolidatione nervorum, contractis artuum extensione subvenit, tumentem hydropisim corporis extenuatione curavit, et quamdam senilis aetatis veteri gibbo imis inflexam, restituit, erecta sursum eius facie, sanitati. His et aliis quamplurimis coruscavit miraculis manifestis, quorum seriem non duximus praesentibus inserendam. Convalescit ex ipsis fides catholica, iudaeorum pertinacia erubescit, confunditur haereticorum fallacia, et obstupescit ignorantia paganorum.

§ 4. Cantet itaque Cantuariensis Ecclesia laudis divinae canticum, quod inter alias modernis temporibus venerabilibus est decorata patronis, unius quidem rubricata martyrio, et confessione alterius candidata. Exultet pleno gaudio fertilis Cantuaria, quod ab Ecclesiae suae area tam purum granum transmittit ad horrea summi Regis. Laetetur et Pontiniacense monasterium, quod et talium, et tantorum Patrum meruit honorari praesentia, dum unus ibidem diu degens illud suae vitae moribus nobilitavit, et alter illuc accedens, ipsum, reddita coelo anima, sui corporis thesauro ditavit; ut quasi adimpleretur, quod ipse gloriosus martyr Thomas, videlicet post longam moram, quam exilii sui tempore in eodem continuavit monasterio, cum ipsis monachis de multa honorificentia charitative sibi ab eis exhibita, respondere iuxta voti sui plenitudinem non valeret, dixisse asseritur, quod esset sibi alius successurus, qui condignam ipsis retributionem responderet pro eadem. Porro quia, quos omnipotens Deus perpetuae corona gloriae in coelis magnificat, summae devotionis studio ab hominibus in terris convenit venerari (ut quo solemniter fideles Sanctorum colunt memoriam, eo dignius eorum patrocinium promerentur):

Sanctorum albo adscribitur.

§ 5. Nos de sanctitate vitae, ac veritate miraculorum eiusdem sancti Eadmundi, curiosae inquisitionis solemnitate, ac districti examinis discussione praemissis, plenariam certitudinem obtinentes, ipsum de communi fratrum nostrorum et praelatorum omnium tunc apud Apostolicam Sedem existentium consilio et assensu, in Dominica (1) de Adventu, qua cantatur: Gandete in Domino semper; sanctorum cathalogo adscribendum, vel iam adscriptum duximus nunciandum.

Eius celebranda festivitas die 16 novembris.

§ 6. Ideoque universitatem vestram monemus, et exhortamur attente per apostolica scripta mandantes, quatenus decimosexto kalendas decembris (cum tunc felix ipsius anima de carnis liberata carcere, ad astra conscendens, aulam coelestem adiverit, Paradisi deliciis fruitura) festum eiusdem devote, ac solemniter celebretis, faciatisque vos fratres archiepiscopi et episcopi per vestras civitates et dioeceses a christifidelibus veneratione congrua celebrari, ut pio eius interventu, et hic ab imminentibus positus periculis erui, et in futuro salutis praemium consequi sempiternae.

Indulgentia eius sepulchrum visitantibus.

§ 7. Caeterum ut ad venerabile eius sepulchrum ferventius et copiosius christiani populi confluat multitudo, ac celebrius eiusdem Sancti agatur solemnitas, omnibus vere poenitentibus et confessis, qui cum reverentia illuc in eodem festo annuatim accesserint, ipsius suffragia petaturi, de omnipotentis Dei misericordia, et beatorum Petri et Pauli apostolorum eius auctoritate confisi, unum annum, et quadraginta dies; accedentibus vero annis singulis ad praedictum sepulchrum infra eiusdem festi octavas quadraginta dies de iniuncta sibi poenitentia relaxamus.

Datum Lugduni, tertio idus ianuarii, pontificatus nostri anno quarto.

Dat. die 11 ianuarii 1247, pontif. anno iv.

(1) III Adventus.

XII.

Confirmatio congregationis monachorum Sylvestrinorum in eremo Sancti Benedicti de Monte Fano mox institutae sub regula sancti Benedicti, et concessio gratiarum et exemptionum.

SUMMARIUM

Exordium. — 1. Eremum hanc sub protectione S. A. suscipit. — 2. Ordo monasticus ibi servari mandat. — 3. Bona omnia ei confirmat. — 4. Novalia eximit a decimis. — 5. Ad ordinem venientes recipiendi dat facultatem. — 6. Prohibitio transeundi ad alium ordinem non strictiorem. — 7. Indultum sacra operandi tempore interdicti. — 8. Sacramenta a dioecesano accipienda. — 9. Privilegiorum concessio. — 13. De prioris electione. — 15. Immunitatum confirmatio. — 16. Clausulae.

Innocentius episcopus servus servorum Dei, dilectis filiis priori eremi de Monte Fano, eiusque fratribus, tam praesentibus, quam futuris, regularem vitam professis, in perpetuum, salutem et apostolicam benedictionem.

Religiosam vitam eligentibus, apostolicum convenit adhibere praesidium, ne forte cuiuslibet temeritatis incursus, aut eos a proposito revocet, aut robur, quod absit, sacrae religionis infringat.

§ 1. Eapropter, dilecti in Domino filii, vestris iustis postulationibus clementer annuimus, et eremum Sancti Benedicti de Monte Fano Cameriniensis dioecesis, in qua divino estis obsequio mancipati, sub beati Petri et nostra protectione suscipimus, et praesentis scripti patrocinio communimus.

§ 2. In primis siquidem statuentes, ut ordo monasticus, qui secundum Deum et beati Benedicti regulam in eadem eremo institutus esse dignoscitur, perpetuis ibidem temporibus inviolabiliter observetur.

§ 3. Praeterea quascumque possessiones, quaecumque bona eadem eremus in praesentiarum iuste ac canonice pos-

sidet, aut in futurum concessione Pontificum, largitione regum vel principum, oblatione fidelium, seu aliis iustis modis, praestante Domino, poterit adipisci, firma vobis, vestrisque successoribus et illibata permaneant. In quibus haec duximus propriis exprimenda vocabulis. Locum ipsum, in quo praefata eremus sita est, cum omnibus pertinentiis suis. Ecclesiam Cryptae Focilis cum pertinentiis suis. Ecclesiam Sancti Bonifilii cum pertinentiis suis. Ecclesiam de Ripa Alta cum pertinentiis suis, cum terris, pratis, vineis, nemoribus, usuagiis et pascuis, in boscho et plano, in aquis et molendinis, viis et semitis, et omnibus aliis libertatibus et immunitatibus suis.

§ 4. Sane novalium vestrorum, quae propriis manibus aut sumptibus colitis, de quibus aliquis hactenus non percepit, sive de vestrorum animalium nutrimentis, nullus a vobis decimas exigere vel extorquere praesumat.

§ 5. Liceat quoque vobis, clericos vel laicos, liberos et absolutos, e saeculo fugientes, ad conversionem recipere, et eos absque contradictione aliqua retinere.

§ 6. Prohibemus insuper, ut nulli fratrum vestrorum, post factam in eremo vestra professionem, fas sit, sine prioris sui licentia, de eodem loco discedere, nisi arctioris religionis obtentu. Discedentem vero absque communium litterarum vestrarum cautione nullus audeat retinere.

§ 7. Cum autem generale interdictum terrae fuerit, liceat vobis, clausis ianuis, exclusis excommunicatis et interdictis, non pulsatis campanis, suppressa voce, divina officia celebrare, dummodo causam non dederitis interdicti.

§ 8. Chrisma vero, Oleum sanctum, consecrationes altarium seu basilicarum, ordinationes clericorum, qui ad ordines fuerint promovendi, a dioecesano suscipietis episcopo, siquidem catholicus fuerit, et gratiam et communionem Apostolicae

Sedis habuerit, et ea vobis voluerit sine pravitate aliqua exhibere.

§ 9. Prohibemus insuper, ut intra fines parochiae vestrae nullus, sine assensu dioecesani episcopi, et vestro, cappellam seu oratorium de novo construere audeat, salvo privilegio Pontificum Romanorum.

§ 10. Ad haec, novas et indebitas exactiones ab archiepiscopis et episcopis, archidiaconis, seu decanis, aliisque omnibus ecclesiasticis, saecularibusve personis, a vobis omnibus fieri prohibemus.

§ 11. Sepulturam quoque ipsius loci liberam esse decernimus, ut eorum devotioni, et extremae voluntati, qui se in illis sepeliri deliberaverint, nisi forte excommunicati, vel interdicti sint, aut etiam publice usurarii, nullus obsistat. Salva tamen iustitia aliarum Ecclesiarum, a quibus mortuorum corpora assumuntur.

§ 12. Decimas praeterea, et possessiones, ad ius Ecclesiarum vestrarum spectantes, quae a laicis detinentur, redimendi, et legitime liberandi de manibus eorum, et ad Ecclesias, ad quas pertinent, revocandi libera sit vobis de nostra auctoritate facultas.

§ 13. Obeunte vero te nunc eiusdem loci priore, vel tuorum quolibet successorum, nullus ibi qualibet subreptionis astutia seu violentia praeponatur, nisi quem fratres communi consensu, vel fratrum maior pars consilii sanioris, secundum Deum et beati Benedicti regulam providerint eligendum.

§ 14. Paci quoque, et tranquillitati vestrae, paterna in posterum sollicitudine providere volentes, auctoritate apostolica prohibemus, ut intra clausuras locorum seu granciarum vestrarum nullus rapinam seu furtum facere, ignem apponere, sanguinem fundere, hominem temere capere, vel interficere, seu violentiam audeat exercere.

§ 15. Praeterea omnes libertates et immunitates a praedecessoribus nostris Romanis Pontificibus eremo vestrae concessas, necnon libertates et exemptiones

Privilegiorum concessio.

De prioris electione.

Immunitatum confirmatio.

saecularium exactionum, a regibus et principibus, vel aliis fidelibus, rationabiliter vobis indultas, auctoritate apostolica confirmamus, et praesentis scripti privilegio communimus.

Clausulae.

§ 16. Decernimus ergo, ut nulli omnino hominum liceat praefatam eremum temere perturbare, aut eius possessiones auferre, vel ablatas retinere, minuere, seu quibuslibet vexationibus fatigare, sed omnia integra conserventur, eorum pro quorum gubernatione ac sustentatione concessa sunt, usibus omnimodis profutura; salva Sedis Apostolicae auctoritate, et dioecesani episcopi canonica iustitia.

§ 17. Si qua igitur in futurum ecclesiastica, saecularisve persona hanc nostrae constitutionis paginam sciens, contra eam temere venire tentaverit, secundo, tertiove commonita, nisi reatum suum congrua satisfactione correxerit, potestatis, honorisque sui careat dignitate, reamque se divino iudicio existere de perpetrata iniquitate cognoscat, et a sacratissimo Corpore et Sanguine Dei, et Domini Redemptoris nostri Iesu Christi aliena fiat, atque in extremo examine districtae subiaceat ultioni.

§ 18. Cunctis autem eidem loco sua iura servantibus sit pax Domini nostri Iesu Christi, quatenus, et hic fructus bonae actionis percipiant, et apud districtum Iudicem praemia aeternae pacis inveniant. Amen, amen, amen.

Notas mihi fac Domine vias vitae.

Ego INNOCENTIUS catholicae Ecclesiae episcopus subscripsi.

† Ego Petrus Albanen. episcopus subscripsi.

† Ego Petrus tit. S. Marcelli presbyter card. subscripsi.

† Ego Wiglelmus basilicae Duodecim Apostolorum presbyter card. subscripsi.

† Ego frater Ioannes tit. S. Laurentii in Lucina presbyter card. subscripsi.

† Ego Ioannes tit. S. Nicolai in Carcere Tulliano diaconus card. subscripsi.

† Ego Wiglelmus tituli S. Eustachii diaconus card. subscripsi.

Datum Lugduni per manum magistri Martini S. R. E. vicecancellarii, quinto kalendas iulii, indictione sexta, incarnationis dominicae MCCXLVII, pontificatus vero domini Innocentii Papae quarti anno quinto.

Dat. die 27 iunii 1247, pontif. anno v.

XIII.

Traditur norma vivendi monialibus ordinis Sancti Damiani, quae cum suis monasteriis regimini et obedientiae ministrorum ordinis Sancti Francisci subiiciuntur (1).

SUMMARIUM

Religiosus regulam observare debet, quam profitetur. — Innocentius regulam hisce monialibus praescribit. — Regula. — Clausura perpetuo servanda. — Defunctae intra claustrum tumulandae. — Praemiitenda in recipiendis. — Forma professionis. — Modus divina persolvendi: — Aut studio aut labori satagendum. — In locutoriis, quae cautela servanda. — De silentio: — Et ieiunio servando. — De infirmis. — Forma indumentorum. — Dormitorii designatio. — Omnibus in monasterio interdictus ingressus. — Cappellani conditiones et munia. — De crate. — Fenestella pro communione. — Visitator se quomodo debeat gerere. — Ei nil occultandum, quod ad monasterium pertineat. — Defectus corrigendi. — Soli ministri, vel eorum commissarii possunt moniales visitare. — Unum tantum ostium in monasterio, et quomodo custodiendum. — Rota facienda cum praescriptis conditionibus. — Locutorium quomodo construendum. — Sororum servientium qualitates. — Quomodo se debeant gerere extra claustra. — Licet monialibus in communi redditus et possessiones recipere. — Procuratoris facultates. — Monasterii cura Minoritis demandatur. — Abbatis electio ad conventum, confirmatio ad ministros Minoritarum pertinet. — Nullus

(1) Ex Waddingo nov. edit., tom. III, pag. 482.

lum monasterium absque licentia capituli generalis aedificandum. — Conversorum servientium habitus. — Capellanus et conversi visitatori subiecti. — Clausulae.

Innocentius episcopus servus servorum Dei, universis abbatissis et monialibus ordinis Sancti Damiani.

Religiosus regulam observare debet, quam prohibetur.

Cum omnis vera religio, et vitae institutio approbata certis constet regulis et mensuris, certis etiam constet legibus disciplinae, quisquis religiosam ducere vitam cupit, nisi certam atque rectam conversationis suae regulam, disciplinamque vivendi observare studuerit diligenter, eo ipso a rectitudine deviat, quo rectitudinis lineas non observat, et ibi deficiendi incurrit periculum, ubi per discretionis virtutem certum ac stabile proficiendi collocare neglexerit fundamentum.

Innocentius regulam huius monialibus praescribit.

Quapropter, dilectae in Domino filiae, quia divina vobis gratia inspirante per arduam viam et arctam, quae ad vitam ducit, incedere, et vitam pauperem ducere pro aeternis lucranda divitiis elegistis, vestris piis precibus inclinati, B. Francisci regulam quantum ad tria tantum, videlicet obedientiam, abdicacionem proprii in speciali, et perpetuam castitatem, necnon formam vivendi praesentibus annotatam, secundum quam specialiter vivere decrevistis, vobis, et iis, quae vobis successerint concedimus observandam; auctoritate apostolica statuente, ut in singulis monasteriis vestri ordinis perpetuis temporibus observetur. Quae talis est.

Regula.

Clausura perpetuo servanda.

Omnes itaque, quae saeculi vanitate relicta, religionem vestram assumere voluerint et tenere: hanc eos legem vitae et disciplinae oportet et convenit observare vivendo in obedientia sine proprio, et in castitate. Omni namque tempore vitae suae hanc vitam profitentes clausurae manere debent, et postquam claustrum huius religionis intraverint aliquae, et professae fuerint hanc regularem observantiam promittentes, nulla eis conce-

datur licentia vel facultas inde ulterius exenodi, nisi forte causa plantandi vel aedificandi eandem religionem, vel reformandi aliquod monasterium, seu causa regiminis vel correctionis, seu alicuius gravis dispendii devitandi per licentiam generalis ministri ordinis fratrum Minorum, seu provincialis illius provinciae eiusdem ordinis, in qua monasterium situm fuerit, ad aliquem locum aliquae transmittantur. Pro alia etiam, et rationabili causa interdum transferri possint de supradicti dumtaxat licentia generalis.

Morientes vero tam sorores, quam servientes, infra claustrum, prout convenit, tumultentur. Omnibus autem hanc regulam assumere cupientibus, et quae fuerint admittendae, priusquam habitum mutant, et religionem assumant, dura eis et aspera praedicentur, per quae itur ad Deum, et quae secundum hanc religionem necesse habuerint firmiter observare, ne de ignorantia postea se excusent. Non recipiatur aliqua, quae vel longiori aetate vel infirmitate aliqua, seu fatua simplicitate ad huius vitae observantiam minus sufficiens et idonea comprobetur. Per tales enim status et vigor religionis saepius dissolvitur et turbatur. Unde in personis recipiendis diligenti studio et cautela huiusmodi debet occasio devitari, etiamsi cum aliqua, aliquando causa rationabili exigente, alicubi forte fuerit dispensandum. Omnes vero ex more intra claustrum receptae, si aetatis intelligibilis fuerint, citius deponant habitum saecularem, et infra paucos dies habitum regularem suscipiant, quibus deputetur magistra, quae ipsas informet regularibus disciplinis, et completo unius anni spatio, professionem faciant in hunc modum: Ego talis soror promitto Deo, et beatae Mariae semper Virgini, beato Francisco, et omnibus Sanctis servare perpetuam obedientiam, secundum regulam et formam vivendi a Sede Apostolica ordini nostro traditam, vivendo toto tempore vitae meae sine proprio, et in

Defunctae intra claustrum tumultandae.

Praesmittenda in recipiendis.

Forma professionis.

castitate. Quod etiam de servientibus firmiter modo simili observetur. De divino Officio tam in die, quam in nocte Domino persolvendo taliter observetur, quod cae, quae legere et canere noverint secundum consuetudinem ordinis fratrum Minorum, cum gravitate tamen et modestia, Officium debeant celebrare; illiteratae vero dicant viginti *Pater noster* pro Matutino, pro Laudibus quinque, pro Prima, Tertia, Sexta et Nona, pro qualibet istarum horarum septem, pro Vesperis autem duodecim, pro Completorio septem, qui modus per omnia in Officio Beatae Mariae Virginis observetur, et orent pro defunctis. Quod si iuenculae aliquae, vel etiam grandiores, capaces ingenii et humiles fuerint, si abbatissae visum fuerit, faciat eas litteras edoceri, magistram eis deputans idoneam et discretam; sorores vero horis statutis, prout ordinatum fuerit, utilibus et honestis laboribus occupentur. Silentium vero continuum, sic continue ab omnibus teneatur, ut nec sibi invicem, nec alicui alii sine licentia eis loqui liceat. Attendat tamen sollicita abbatissa ubi, quomodo, et qualiter sororibus loquendi licentiam largiatur, omnes autem uti studeant signis religiosis pariter et honestis. Sane quando aliqua persona religiosa, vel saecularis, vel cuiuslibet dignitatis loqui petierit alicui sororum, nunciatur prius abbatissae, et si ipsa concesserit, accedens ad locutorium duas alias ad minus habeat semper secum, quibus iusserit dicta abbatissa, quae loquentem videant, et audire valeant quae dicuntur. Hoc namque firmiter observetur ab omnibus, ut quando de confessione sacerdoti interius infirma fuerit aliqua locutura, non loquatur nisi ad minus duabus non longe sedentibus, quae confidentem et confessorem videre possint, ab eisdem pariter et videri. Hanc autem loquendi legem, et ipsa abbatissa diligenter custodiat, ut omnis omnino materia detractionis omnibus auferatur. Excepto quod cum sororibus horis et locis

Modus divina persolvendi.

Aut studio aut labori satagendum.

In locutorii, quae cautela servanda.

De silentio.

competentibus loqui potest, sicut et secundum Deum visum fuerit expedire. Sorores vero infirmae et servientes, eisdem iuxta dispositionem abbatissae, infirmitatis suae tempore in infirmitario loqui possunt. Sorores autem et servientes a festo Exaltationis Sanctae Crucis usque ad festum Resurrectionis Dominicae continuum servent ieiunium, diebus dominicis, Beati Michaelis, Beati Francisci, Omnium Sanctorum, Nativitatis Domini, cum duobus immediate sequentibus diebus, necnon Epiphaniae et Purificationis exceptis. Verum a Resurrectione Dominica, usque ad Exaltationem Sanctae Crucis, nisi sexta feria et ieiuniis statutis universaliter ab Ecclesia ieiunare minime teneantur. Vino quoque, et piscibus, ovis, caseo et lacticiniis aliisque pulmentis licite possint uti. Ab Adventu tamen, usque ad Nativitatem Domini, maiori Quadragesima, necnon et sexta feria, ac aliis ieiuniis generaliter ab Ecclesia institutis, ovis, caseo, caeterisque lacticiniis non utantur. Cum servientibus tamen sororibus circa ieiunium, praeterquam in Adventu et Quadragesima maiori, et sexta Feria, ac aliis ieiuniis generaliter ab Ecclesia institutis, possit abbatissa misericorditer dispensare. Praefatam autem ieiunii et abstinentiae legem adolescentulae infra decimum quartum annum, vel anus seu debiles observare minime teneantur, quibus secundum eorum imbecillitatem, tam in carnibus, quam in necessariis aliis possit misericorditer provideri. Sane quoque ieiunare non tenentur minutionis suae tempore, extra maiorem quadragesimam, et sextam feriam Adventus Domini, et ieiunia ab Ecclesia generaliter instituta; caveat tamen abbatissa ne ultra quater in anno minutionem permittat communiter celebrari, nisi manifesta necessitas plus requirat, nec a persona extranea maxime vero minutionem accipiant aliqua ratione ubi commode poterit evitari. De

Et ieiunio servando.

De indolis: infirmis vero cura et maxima diligentia habeatur, et secundum quod possibile fuerit et decreverit tam in cibariis, quae earum requirit infirmitas, quam in aliis etiam necessariis in fervore charitatis benigne ac sollicitate eis per omnia serviantur. Quae vero infirmae proprium habeant locum, si unquam fieri potest, ubi a sanis maneant separatae, ne illarum ordinem et quietem confundere valeant vel turbare. Unaquaeque soror, praeter cilicium, vel stamineam, si habuerit duas tunicas, vel etiam plures, secundum quod visum fuerit abbatissae, habere valeat et mantellum longitudinis et latitudinis congruentis, et haec indumenta sint de panno vili tam pretio, quam colore, iuxta diversarum consuetudinem regionum. Pro cingulo autem chordam habeant, exceptis sororibus servientibus, quae cingulum portent laneum et non chordam. Habeant et scapularia sine capucio de levi et religioso panno, vel staminea amplitudinis et longitudinis congruentis, sicut unius cuiusque qualitas exigit, vel mensura, quibus induantur cum laborant, vel aliquid tale agunt, quod pallia congrue gestare non possunt. Si tamen illae simul habere voluerint cum mantellis, vel etiam iacere cum illis minime prohibentur: possunt et sine ipsis aliquando esse, si visum fuerit abbatissae, cum forte propter calorem nimium, vel aliquid aliud eis gravia multum fuerint ad portandum. Vittis, aut peplis omnino albis, non tamen cunosis, capita sua cooperiant uniformiter et honeste, ita quod frons, genae et collum sint, ut convenit, cooperta, nec aliter coram extraneis personis audeant apparere. Habeant et nigrum velum extensum super capita, ita amplum et longum, quod ex unaquaque parte descendat usque ad scapulas, et retro parvum ultra tunicae caputium protendatur. Sorores vero novitiae album velum tantum eiusdem mensurae debeant deportare. Servientes autem sorores pannum lineum album ad modum tunicae

super capita sua deferant tantae longitudinis et amplitudinis, quod ipsas scapulas, atque pectus, praecipue cum exeunt, valeant operire. Omnes sorores sanae, tam abbatissa, quam aliae iacere in communi dormitorio teneantur, et quaelibet lectum per se habeat ab invicem separatum; lectus tamen abbatissae in tali loco dormitorii disponatur, quod in caeteros dormitorii lectos sine obstaculo, si possibile est, valeat intueri. Liceat autem unicuique habere sacconem de palea, vel de foeno, et cervical cum panno lineo superposito, quod de foeno, seu palea, aut lana, seu etiam pluma esse poterit, iuxta quod abbatissa iudicaverit faciendum. Habeant etiam honesta coopertoria lanea, sive cultras religiosas, cum lanea habere nequiverint; congruenter lampas insuper de nocte accensa, semper in medio dormitorii habeatur. Capillos suos tondeant usque ad aures certis temporibus communiter, nec aliqua de caetero tonsuretur, nisi evidenti infirmitate corporis exigente. De ingressu personarum in monasterium firmiter et districte praecipimus, ut nulla unquam abbatissa, vel eius sorores aliquam personam religiosam, seu saecularem, aut cuiuslibet dignitatis in monasterio intrare permittant; nec omnino hoc alicui liceat, nisi cui et de quibus concessum fuerit a Sede Apostolica, vel a generali, seu provincialibus ordinis fratrum Minorum, in quorum provinciis monasteria ipsa consistunt. Excipiuntur autem a dicta ingrediendi lege medicus et minor causa multum gravis infirmitatis, qui non absque duobus sociis honestis de familia monasterii introducantur, expedito negotio huiusmodi celeriter egressuri, nec ab invicem intra monasterium separentur; nec non illi, quos occasione incendii, vel ruinae, seu alterius periculi, vel dispendii, seu pro tuendis a violentia quorumlibet monasterio, vel personis, aut pro aliquo opere exercendo, quod commode extra monasterium fieri non potest, ne-

Dormitorii designatio.

Omnibus in monasterio interdictus ingressus.

cessitas exegerit introire. Nulli tamen extraneae personae intra monasterii claustrum liceat comedere vel dormire; sed et si quis de cardinalibus ad aliquod monasterium huius religionis venerit, et in illud voluerit ingredi, cum reverentia quidem, et devotione suscipiatur, ut cum uno vel duobus de honestioribus quidem sociis debeat introire; duobus vel tribus tantum religiosis et honestis sociis sit contentus. Quod si forte pro benedictione vel consecratione sororum, vel alio etiam modo concessum alicui episcopo fuerit Missam interius aliquando celebrare, quam paucioribus et honestioribus potuerit, contentus sit ministris, et hoc ipsum rarius alicui concedatur. Nulla tamen omnino loquatur cum aliquo, nisi praefato modo sive infirma fuerit, sive sana: illud sane praecipue caveatur, ut ii, quibus aliquando fuerit concedendum in monasterium ingredi, tales sint, de quorum verbis et moribus, necnon vita et habitu aedificari valeant intuentes, et materia iusti scandali exinde nequeat generari. Ubi vero proprius fuerit cappellanus, habitu et vita religiosus sit, ac bonae famae, nec multum iuvenis, necnon idoneae sit aetatis. Qui cappellanus, cum aliqua sororum, gravi corporis infirmitate detenta, visa fuerit tendere ad extrema, et necesse habuerit confiteri, vel Domini Corporis accipere sacramenta, alba stola et manipulo ingrediatur indutus, et audita confessione, vel Dominici Corporis tradito sacramento, sic indutus, ut ingressus est, exeat, nec moram ibi faciat longiorem. Caveant etiam, ut quamdiu intra monasterium fuerint, nullatenus ab invicem separentur, quin semper mutuo possint libere se videre, sic se etiam habeat in animae commendatione. Porro ad exequias circa sepulturam agendas non ingrediatur claustrum, sed exterius in cappella, quae ad illud officium pertinet, exequatur; tamen si abbatissae visum fuerit, quod ad exequias debeat introire, modo suprascripto indutus intret, et se-

Cappellani conditiones et munera.

pulta mortua exeat sine aliqua mora. Si autem necesse fuerit, ut ad aperendam, seu praeparandam sepulturam, seu certe postmodum coaptandam ingrediatur, sit ei, vel alicui alii ad hoc idoneo et honesto licitum introire; aliter vero monasterium ingredi non praesumat, sed cum aliqua sibi de confessione loqui voluerit, per locutorium eam audiat et per illud eidem ipse loquatur. Quae vero proprium non habuerit cappellanum, a quolibet bonae famae et honestae vitae presbytero missam audire possunt. Poenitentiam autem, atque Dominici Corporis sacramenta tantum a fratribus ordinis Minorum dumtaxat recipiant, nisi in periculosae necessitatis articulo aliqua constituta pro his habere copiam fratrum nequiverit praedictorum. Volumus etiam, ut in muro, qui sorores dividit a cappella, congruentis formae cratis ferrea collocetur, cui crati pannus lineus niger interius taliter apponatur, ut nulla inde valeat exterius aliquid intueri; habeat et ostia lignea, ex parte sororum cum seris ferreis, atque clavi, ut maneant semper clausa pariter, et firmata, et non aperiantur, nisi cum divinum celebratur Officium, vel ad audiendum aliquando verbum Dei, proponendum sibi exterius in cappella per idoneam et honestam personam, et nemo alias per dictam cratem loquatur, nisi forte aliquando causa rationabili, vel necessaria exigente, alicui raro fuerit concedendum. Et quandocumque aliquam personam extraneam ad eas ingredi, vel alias per cratem eis loqui contigerit, tegant facies suas cum modestia et inclinent, prout religionis convenit honestati. Pro communione autem certis temporibus recipienda, ubi necesse fuerit, fenestra parvula fiat cum ostiolo de lamina ferrea, sera et clave semper firmata, per quam calix possit dari congrue, et ministrari Dominici Corporis sacramentum, et tantum distet a terra, quod sacerdos commode illud ministerium inde valeat exhibere. De visitatore huius religionis.

De crati.

De fenestella pro communione.

Quomodo se gerere debeat visitator:

illud est sollicite providendum, ut quicumque, vel generalis, vel etiam alicubi aliquando specialis constituendus fuerit visitator, talis debet constitui, de cuius religiosa vita et moribus atque fide notitia plena et securitas habeatur, qui cum ad monasterium aliquod veniens fuerit introgressus, sic se per omnia exhibeat et ostendat, ut de bono ad melius provocet, et ad Dei amorem et inter se mutuam charitatem semper inflamet pariter et accendat; et quando monasterii claustra ad visitandum intraverit, duos religiosos et idoneos socios secum ducat, qui videlicet socii simul maneant et dum fuerint intra claustrum ab invicem nullatenus separentur. Sane de sororum statu et observantia suae religionis ab omnibus generaliter et specialiter a singulis inquirat studiosus veritatem, et ubi aliquid reformandum vel corrigendum invenerit, zelo charitatis, et amore iustitiae cum discretione corrigat et reformet, tam in capite, quam in membris, sicut melius viderit expedire. Modum autem loquendi custodiat suprascriptum, ut videlicet, aut cum omnibus, aut cum pluribus simul loquatur, vel secrete cum una, aliis tamen ad minus duabus in aspectu eius non longe sedentibus, ut per omnia bonae famae integritas conservetur, nisi ad locutorium cum una, vel pluribus loqui voluerit de iis, quae ad officium suum pertinere noscuntur. Caveat autem abbatissa, ne a se, vel ab aliis sororibus status sui monasterii visitatori aliquatenus abscondatur, quia malum esset inditium, et offensa graviter punienda: imo volumus et mandamus, ut ei quae secundum vitae suae formam statuenda, vel emendanda fuerint, publice ac privatim sicut melius fuerit faciendum, visitatori diligenter suggerant et proponant, cui teneantur in omnibus firmiter obedire. Quae autem aliter fecerint, a visitatore, tam abbatissa, quam aliae, digne, prout convenit, puniantur: similiter, et cappellani si in aliquo reprehensibilis

Et nisi occultandum, quod ad monasterium pertinet.

Defensor corrigendi

fuerit, in quo convenienter non possit, nec debeat supportari, monitione praemissa, a visitatore modeste et rationabiliter, sicut decuerit, corrigatur. Si vero noluerit, vel contempserit emendare, a monasterio per eundem removeatur omnino. Statuimus insuper, quod generalis et provincialis ministri dicti ordinis dumtaxat per se, vel per alios idoneos suos fratres in generali capitulo deputatos ab ipsis, vobis tam in capite, quam in membris officium visitationis impendant; possint tamen generalis et provincialis praefati in provinciis suis ex causa, specialem visitatorem interdum de fratribus sibi commissis ad hoc idoneum destinare, iuxta formam ab universitate ministrorum traditam in capitulo generali. In quolibet monasterio unum tantum ostium habeatur ad intrandum claustrum, et exeundum cum oportuerit, iuxta legem de ingressu et egressu positam in hac forma, et istud ostium fiat in sublimi quanto magis fieri potuerit congruenter, ita quod ad ipsum per scalam levatoriam exterius ascendatur, quae scala per catenam ferream ex parte sororum studiose ligatam a Completorio dicto usque ad Primam diei sequentis continue sit suspensa, et tempore diurnae dormitionis et visitationis, nisi aliud interdum evidens requirat necessitas vel utilitas manifesta. Ad praefatum autem ostium custodiendum aliqua talis ex sororibus deputetur, quae omnino Deum timeat, quae sit matura moribus, sit diligens et discreta, sitque convenientis aetatis, quae unam ipsius ostii clavem sic diligenter custodiat, ut numquam ea, vel eius socia ignorante, ostium aliquando valeat aperiri: reliquam vero clavem diversam ab alia custodiat abbatissa, sit et alia aequae idonea ei socia deputata, quae eius vicem in omnibus exequatur cum ipsa aliqua rationabili causa, vel occupatione necessaria occupata fuerit et detenta. Caveant autem studiosissime, et procurent, ne unquam ostium sit aper-

Soli ministri, vel eorum commissarii possunt moniales visitare.

Unum tantum ostium in monasterio, et quomodo custodiendum.

tum, nisi tantum, quantum minus fieri poterit congruentes. Sit autem ostium seris ferreis, cum valvis et repagulis optime communitum et sine custodia apertum minime dimittatur, nec etiam clausum nisi una clave in die, et in nocte duabus sit firmiter obseratum, nec omni pulsanti aperiatur statim, nisi prius indubitanter cognoverit, quod talis sit, cui sine dubitatione aliqua secundum mandatum, quod in eadem forma de ingressuris superius continetur, debeat aperiari. Quod si aliquando intra monasterium opus aliquod fuerit faciendum, ad quod agendum saeculares aliquos, vel quascumque personas alias oporteat introire, provideat abbatissa sollicite, ut tunc, dum opus scilicet exercetur, aliqua alia persona conveniens ad custodiendum ostium statuatur, quae sic personis ad opus deputatis aperiat, quod alias intrare non permittat. Nam sorores ipsae, et tunc et semper quantumcumque rationabiliter praevalent, studiosissime caveant, ne a saecularibus, vel a personis extraneis videantur. Caeterum cum praefatum ostium pro aliis aperiari nolumus, nisi pro illis tantum, quae per rotam, vel aliunde decenter nequeunt expediri, mandamus quatenus, quod in singulis monasteriis in loco competentis rota una fortis fieri debeat latitudinis et altitudinis, per quam necessaria tam intus, quam exterius ministrentur, et taliter disponatur, quod per eam nec intus, nec extra valeat aliquis intueri. Ex utraque etiam parte ostiolum fiat validum, quod de nocte et in aestate, tempore dormitionis, seris et clavibus ferreis clausum et firmatum debeat permanere. Ad cuius custodiam pro expediendis necessariis per eandem unam sororem discretam, securam et maturam tam moribus, quam aetate, quae monasterii diligat honestatem, constituat abbatissa, cui soli, vel deputatae sibi sociae, cum congrue non potuerit interesse, loqui ibidem et respondere liceat super iis, quae ad suum officium pertinebunt. Locutorium autem

Rota facienda cum praescriptis conditionibus.

commune in cappella, vel potius in claustro, ubi commodius et honestius fieri poterit, disponatur, ne, si forte fieret in cappella, pacem orantium inquietet. Ipsum vero locutorium sit congruae quantitatis, velamina ferrea subtiliter perforata et taliter clavibus fortibus coaptata, quod nunquam valeat aperiari, cui pannus niger lineus interius taliter apponatur, quod ipsae videre extra non valeant, nec videri. Ad istud locutorium a Completorio, quod dici debet tempore competentis, usque post ad Primam diei sequentis, seu tempore comestionis, vel dormitionis in aestate, aut quando officium celebratur, nisi pro causa adeo rationabili, vel necessaria, quae commode differri non possit, nulli licitum erit loqui. Quodcumque vero in concessis temporibus aliquam, vel aliquem habuerit, ubi loqui, cum modestia et maturitate loquentes, breviter se expediant, prout decet. De servientibus sororibus, quae semper manere clausae sicut aliae non tenentur, districtius volumus observari, ut sine licentia nulla claustrum ingrediatur, et quae emittant honestae sint et convenientis aetatis, et calceamentis, tam ipsae, quam sorores illae, quas aliquando emitti contigerit, pro casibus suprascriptis calceatae incedant: caeteris autem intus manentibus, si voluerint, liceat istud idem. Egredebantibus vero assignetur certus terminus redeundi. Nec alicui ipsarum conceditur extra monasterium sine speciali licentia comedere, bibere, vel dormire, nec ab invicem separari, vel alicui in secreto, seu cappellani monasterii, aut conversorum, vel fratrum ibidem morantium domicilium introire, quod si aliqua contrarium fecerit, graviter puniatur. Et sollicite caveant, ne ad loca suspecta divertant, vel cum personis malae famae familiaritatem habeant, nec in suo reditu saecularia, vel inutilia sororibus referant, quae dissolvi valeant, vel turbari, vel quamdiu extra fuerint taliter studeant se habere, quod

Locutorium quomodo construendum.

Sororum servientium qualitates.

Quomodo se debeant gerere extra claustra

Licet monialibus in communi redditus et possessiones recipere.

Procuratoris facultates.

Monasterium cura Minoritum demandatur.

de conversatione honesta ipsarum aedificari valeant intuentes, et quidquid eis datum fuerit, vel promissum, resignent et renuncient abbatissae, vel aliae, cui haec commiserit vices suas. Ad haec liceat vobis in communi redditus, et possessiones recipere et habere, ac ea libere retinere, pro quibus possessionibus modo debito pertractandis procurator unus prudens pariter et fidelis in singulis monasteriis vestri ordinis habeatur quando-cumque expedire videbitur, qui per visitatorem constitui et amoveri debeat, sicut viderit expedire. Hic vero taliter constitutus de omnibus sibi commissis, receptis pariter, et expensis, abbatissae et tribus aliis sororibus ad hoc specialiter assignatis, et visitatori, cum voluerit, rationem reddere teneatur, et nihil omnino de rebus monasterii vendere, commutare, obligare, vel alienare quoquo modo valeat, nisi de licentia abbatissae pariter, et conventus, et quidquid contra hoc fuerit attentatum irritum decernimus et inane. Possit tamen de mobilibus parum valentibus aliqua parva ex causa licita interdum aliis elargiri. Verum ne ab observatione praesentis formulae breviter suprascriptae, quam uniformiter ubique ab omnibus volumus et mandamus diligentius observari, pro defectu certi regiminis in posterum recedere vos contingat, aut sub diversorum magisterio vivendi modos incurrere differentes: Dilectis filiis generali et provincialibus ministris ordinis fratrum Minorum curam vestri et omnium monasteriorum vestri ordinis plene in omnibus praesentium auctoritate committimus. Statuentes, ut sub eorum et aliquorum, qui pro tempore ministri fuerint, obedientia, regimine et doctrina debeatis de caetero permanere, quibus teneamini firmiter obedire. Et ipsi animarum vestrarum sollicitudinem gerentes, et curam eisdem monasteriis per se, vel per alios fratres suos ad hoc idoneos, secundum formam praetactam deputatos ab ipsis quotiens expe-

dire viderint, visitationis officium impendere studeant, corrigendo et reformando ibidem, tam in capite quam in membris, quae correctionis, seu reformationis officio noverint indigere. Instituant nihilominus et destituant, mutent et ordinent, prout secundum Deum viderint expedire. Electio tamen abbatissae libere pertineat ad conventum. Confirmatio vero ipsius, et infirmitas fiant per generalem ministrum, si aderit in provincia, et in eius absentia per provincialem illius provinciae, in qua monasterium fuerit constructum. Confessiones vestras audiant et ministrent vobis ecclesiastica sacramenta. Et ne pro eo, quod in vestris monasteriis fratres dicti ordinis residere non tenentur, pro defectu sacerdotis possit periculum imminere, ad confessiones vestras in necessitatis articulo audiendas et ministranda sacramenta praetacta, necnon divina officia celebranda deputent aliquos discretos et providos cappellanos. Nec aliquod monasterium vestri ordinis de caetero ab aliquo inchoetur sine capituli generalis ordinis memorati licentia et assensu. Cappellanus et conversi secundum dispositionem visitatoris promittant obedientiam abbatissae, voventes loci stabilitatem, et perpetuo vivere sine proprio et in castitate: liceat tamen visitatori tam cappellanum et servientes sorores, quam conversos pro evidenti necessitate, aut manifesta utilitate, de uno monasterio ad aliud transmutare, ieiunium servare debeant ut sorores: licet tamen abbatissae super hoc cum eis aestus, vel itineris, vel laboris alterius, seu alia quavis rationabili causa misericorditer dispensare. Tunicas de vili panno, iuxta eorum indigentiam habere valeant sine caputio, quarum manicae sint breves et strictae tantummodo circa manus: longitudo autem tunicarum sit talis, quod a cavilla pedum distent spatium quatuor digitorum. Pro cingulo vero corrigiam honestam habeant cum cultello, caparonem etiam super tunicas portent, cuius longi-

Abbas electio ad conventum. confirmatio ad ministros Minoritarum pertinet.

Nullum monasterium absque licentia capituli generalis aedificandum.

Conversorum servientium habitus.

Capellanus et conversi visitatori subiecti.

Claustrum.

tudo genu aliquantulum transeat, et amplitudo usque ad cubitos protendatur. Minoris tamen latitudinis caparonem, si voluerit, habere poterit cappellanus, qui cappa etiam honesta tibi poterit cum fuerit opportunum. Calceamenta cum caligis et braccis ampla et alta habeant et ante fissa, et idem Officium faciant conversi, quod superius de sororibus nescientes litteras est expressum, excepto quod ad officium Beatae Virginis minime teneantur. Informationi etiam, et correctioni visitatoris conversi et capellanus per omnia sint subiecti, cui teneantur firmiter obedire.

Nulli ergo omnino hominum liceat hanc nostrae concessionis et constitutionis paginam infringere, vel ei ausu temerario contraire. Si quis autem hoc attentare praesumpserit, indignationem omnipotentis Dei, ac beatorum Petri et Pauli apostolorum eius se noverit incursurum.

Datum Lugduni, octavo idus augusti, pontificatus nostri anno quinto.

Dat. die 6 augusti 1247, pontif. anno v.

XIV.

Declaratio et mitigatio regulae fratrum ordinis Beatae Mariae de Monte Carmelo, ab Honorio Tertio hactenus approbatae.

SUMMARIUM

Exordium. — 1. Mitigationem regulae approbat. — 3. Tenor mitigationis.

Innocentius episcopus servus servorum Dei, dilectis filiis priori, et fratribus Eremitis ordinis Beatae Mariae de Monte Carmelo, salutem et apostolicam benedictionem.

Exordium.

Quae honorem Conditoris omnium, et profectum continent animarum, roboris praesidio sunt fulcienda perpetui: sed illa praecipue, super quae Apostolicae Sedis auctoritas salubris providentiae studium noscitur habuisse.

§ 1. Cum itaque nos ad vestrae supplicationis instantiam, per dilectum filium Hugonem tituli Sanctae Sabinae presbyterum cardinalem, et venerabilem fratrem nostrum Guillelmum Anteradensem episcopum, quaedam regulae vestrae dubia declarari et corrigi, ac etiam quaedam ipsius gravia misericorditer fecerimus mitigari, prout in litteris inde confectis plenius continetur; nos vestris piis desiderii annuentes, declarationem et correctionem, ac mitigationem huiusmodi auctoritate apostolica confirmamus, et praesentis scripti patrocinio communi-

§ 2. Tenorem vero litterarum ipsarum, de verbo ad verbum, fecimus praesentibus annotari, qui talis est:

§ 3. Frater Hugo miseratione divina tituli Sanctae Sabinae presbyter cardinalis, et frater Guillelmus eadem miseratione Anteradensis episcopus, charissimis in Christo filiis religiosi viri, priori generali, et definitoribus capituli generalis, ordinis fratrum gloriosissimae Dei Genitricis, semperque Virginis Mariae de Monte Carmelo, salutem in omni salutari. Accedentes ad Apostolicam Sedem fratres clerici, Rynaldus et Petrus ordinis vestri, ex parte vestra a domino Papa humiliter postularunt, ut quaedam, quae in vestro privilegio et regula olim vobis a felicis memoriae Alberto patriarcha Hierosolymitano tradita continentur dubia, declarare, corrigere, et quaedam gravia misericorditer mitigare dignaretur. Cum igitur dominus Papa, eorum devotis supplicationibus annuendo, nobis commiserit, ut declarationem, correctionem, ac mitigationem huiusmodi faceremus vice ipsius, secundum quod bono statui ordinis, et fratrum saluti expediens videremus; religioni vestrae, qua fungimur auctoritate, mandamus, quatenus regulam a nobis correctam, declaratam et mitigatam, prout expedire vidimus, devote recipientes, eam firmiter observetis, et ad instar eiusdem alias vestras regulas cor-

Mitigationem regulae approbat.

Tenor mitigationis.

rigatis, quam vobis per eosdem fratres sub sigillis nostris mittimus in hac forma.

Albertus Dei gratia etc.

(Reliquum inventes in Constit. Honor. III, « Ut vivendi » incipien., usque in finem, pag. 415).

Nulli ergo etc. Si quis etc.

Datum Lugduni, kalend. septembris, pontificatus nostri anno quinto.

Dat. die 1 septembris 1247, pontif. anno v.

XV.

Civitas Auximana episcopali privata dignitate Humanatensibus subiicitur episcopis (1).

SUMMARIUM

Auximana civitas episcopali dignitate privata: eaque dignitate ornata Recanatensis: — Et Auximana civitas Humanatensi subiecta.

Innocentius episcopus servus servorum Dei, venerabili fratri nostro episcopo Humanatensi, salutem et apostolicam benedictionem.

Cum olim Apostolicae Sedis providentia, cuius praesul Illius vices, licet insufficientibus meritis, gerit in terris, qui unicuique pro meritis condigna retributione respondet, de cuius manibus pendet aequitatis statera, subiectorum actiones diiudicans diligenter, ac bene meritis et indignis iuxta suorum actuum exigentiam recompensans, virisque meritorum suorum stipendia inferendo, villam Auximanam, propter infidelitatem, rebellionem et indevotionem incolarum eiusdem episcopatus honore privaverit, ac statuerit, quod castrum Recanat. ob devotionem et fidelitatem habitantium in eodem, quod erat Humanatensi Ecclesiae lege dioecesana subiectum, huius honore polletet, nos in recompensationem dicti castri spiritualis iura, quod in ipsa villa,

(1) Ex Ughell., Ital. Sac., tom. 1, ubi de Humanatens. episcopis.

et circa eam Humanatens. quondam episcopus habebat, ejusdem tibi, et per te dictae Humanatensi Ecclesiae auctoritate apostolica concedimus in perpetuum eandem villam tibi dioecesana lege spiritualiter submitendo.

Nulli ergo omnino hominum nostrae concessionis paginam infringere liceat, vel ei ausu temerario contraire. Si quis autem hoc attentare praesumpserit, indignationem omnipotentis Dei, ac beatorum Petri et Pauli apostolorum eius se noverit incursum.

Datum Lugduni, tertio idus octobris, pontificatus nostri anno quinto.

Dat. die 13 octobris 1247, pontif. anno v.

XVI.

Populo Placentino facultas conceditur publicam instituendi Accademiam, episcopo vero lauream conferendi doctoralem (1).

SUMMARIUM

Exordium. — Concessio, de qua in rubrica, cum privilegiorum elargitione. — Clausulae.

Innocentius episcopus servus servorum Dei, venerabili fratri episcopo, et dilectis filiis clero, et populo Placentino, salutem et apostolicam benedictionem.

Quia profectum terrae in visceribus amplectitur charitatis, vellemus libenter, quod ibi schypus reperiretur argenteus, idest studium litterarum, in quo Ioseph subtiliter novit ingenua auguria explicare, quique ibi argentum eloquentiae venarum suarum obtineat principia, et locus esset in quo aurum sapientiae conflaret. Credimus enim, et pro firmo tenemus, quod ex hoc ipsi civitati Placentiae non modicum honoris accederet, et sibi possent exinde spiritualiter et temporaliter grata comoda provenire. Propter quod non tam consideratione tui, frater Alberte,

(1) Ex Ughell., tom. II, ubi de Ecclesia Placentina.

Et Auximana civitas Humanatensi subiecta.

Concessio (de qua in rubrica), cum privilegiorum elargitione.

nobis super hoc instanter supplicantis, quam etiam ob ipsius civitatis augmentum generale ibi fieri studium cupientes, ut ipsam civitatem Placentiae ad hauriendum aquas cum gaudio hominum copiosa confluat multitudo, et ibi turris David, cum suis propugnaculis construat, ex quo non solum dependeant mille clypei, sed etiam omnium fortium armatura, omnibus doctoribus et scholaribus in quacunque facultate in praedicta civitate studentibus, quod eisdem privilegiis, indulgentiis, libertatibus et immunitatibus gaudeant, quibus Parisiis, seu Bononiae, vel aliis studiis generalibus laetantur, auctoritate praesentium indulgemus.

Clausulae

Nulli ergo omnino hominum liceat hanc nostrae concessionis paginam infringere, vel ei ausu temerario contraire. Siquis autem hoc attentare praesumpserit indignationem omnipotentis Dei, ac beatorum Petri et Pauli apostolorum eius se noverit incursum.

Datum Lugduni, octavo idus februarii, pontificatus nostri anno quinto.

Dat. die 6 februarii 1248, pontif. anno v.

XVII.

Revocatis iis, quae contra libertatem ecclesiasticam a Friderico rege in Sicilia acta sunt: nonnulla statuuntur ad libertatem ac disciplinam ecclesiasticam in eodem regno reparandam (1).

SUMMARIUM

Flagitia Friderici regis deplorat. — Siciliae regni libertatem ab eo violatam refert. — Damna ab eo eidem illata. — Res Ecclesiae violatae. — Ecclesiasticam auctoritatem in eo sibi vindicat. — Innocentii de eodem regno cura. — Abrogatis iniquis Friderici legibus, bona omnia Ecclesiis restituit. — Libere fieri electiones iubet. — Provisionesque a Friderico factas irritat. — Prohibet clericos ad saecularia trahi.

(1) Ex originali edidit Gattula, Access. ad Hist. Cassinen., tom. II, pag. 717.

Bull. Rom. Vol. III.

68

judicia. — Censuris irretiti in foro ecclesiastico non admittantur. — fura omnia episcopis restituantur. — Clausulae.

Innocentius episcopus servus servorum Dei, ad observantiam et memoriam perpetuam.

A diebus Friderici, alumni nequitiae, quasi Antichristi praenuntii, Siciliae regnum vim patitur, et ministri eius praedatione illud diripiunt violenta: nam, ut vitae suae cursum brevi loquio transcurramus, et longam perversorum actuum eius telam compendiosa verborum serie decurtemus, postquam multas et periculosas, Apostolicae Sedis praesidio, evasit insidias, coepitque libere in regno, plenas ibi habenas illi tribuente Domino, principari, sic in superbiae altitudinem est elatus, et in saevitiae acerbiter obrigit, quod de humilitatis substantia cuius in adversis se simulabat amicum, et de benignitatis mansuetudine, quam blando prius mentiebatur affectu, nihil omnino reticens, et de virtute divina non tremuit, humanamque parvipendit potentiam, et honorem Ecclesiae, ac libertatem hominum dicti regni tyrannide furibunda depressit; plurimum olim mitis in nubilo, sed nimium severus postmodum in sereno; verborum tunc dulcedine melleus, sed postea felleus amaritudine operum; ante quidem promissionis blandimento multimode liniens, sed postremo, ut scorpio, persecutionis aculeo dire laedens, de multiplicis etenim necessitatis angusto in quo draco iste latuerat, et ob affluentis opulentiae amplitudinem famelicus, et sitibundus exiliens, rabido coepit ore regnum laniare praefatum. Tamen illius, rerum suarum scilicet ubertatem consumens in cibum, et sanguinem in potum exhauriens hominum, videlicet eius vitam: sicque namque in bona et personas ipsius anxia exarsit ingluvie, quod haec insatiabili rapacitate discerpens illud, proli dolor! feras plus fera qualibet, fere penitus absorbit in utrisque, nec sexum, nec aetatem, nec ordinem praetermittens: oh

Flagitia Friderici regis deplorat.

Siciliae regni libertatem ab eo violatam refert.

quam pestilenti colono hic ager commissus extitit tam fertilis et amoenus; qui nunquam eum coluit, sed semper de ipso collegit, non adauxit cultura congrua fructus eius, sed verius illos indebitis collectis exhaustis, nusquam ad ipsum cultoris curam adhibuit, sed curiositatem assidui collectoris: o quam perverso rectori tantum ac tale creditum fuit regnum, qui suis tantummodo nefariis votis intentus, impie ad illud prosiluit excidium, ut suum ferinum animum inhumanitatis immanitate placeret, cunctos utique praedans, gubernator dissipans, defensor offendens, dux devians, princeps praecipitans et rex rodens. Heu itaque quia gratiosum et pretiosum regnum, cui Dominus in omnibus benedixerat, de alto gloriae in imum miseriae corruit, sub inimicae adversitatis dominio variis tribulationibus contristatum, quod olim ex amicae prosperitatis arrisu affluentibus commodis laetabatur! Heu quia speciosum regnum tanta mutatum alteratione cernitur, quod omnino a se ipso priore discrepare videtur, et vix illud, qui hoc in sua prima inspexerunt effigie, recognoscunt: defecerunt enim ipsius optima, imo in contraria diverterunt! Heu quidem pulchritudo deformis, ingenuitas degener, libertas ancilla, foecunditas sterilis, populositas deserta, et fortitudo infirma; subripuit fletus risum eius, et gaudium suum desiit in lamentum! O quotiens dolorose suspirat et lachrymatur amare Apostolica Sedes, quod regnum iuris et proprietatis suae, carum quippe sibi, dura Pharaonicae oppressionis mole prosternitur, nec sinitur pia consolationis apostolicae dextra relevari; porro nec Ecclesias, nec personas ecclesiasticas, earumque iura et bona in regno ipso draconis huiusmodi furor praeteriit, sed in haec eo ferocius excaudit, quo quidquid ecclesiastico discernitur nomine, odio abhorruit graviori. Tanta enim impietate corpus ibi obtrectavit Ecclesiae, quod ipsum

Dama ab eo
eodem illata.

Res Ecclesiarum
violatae.

scindens, quasi ad nihilum hoc redegit; nam illud primum omni ornamento denudans, et deinde incalescente saevitia, factus Herode hic nequam Herodior, rabiosis demembrans morsibus, totam demum carnem voravit ipsius, corrosit etiam ossa, et insuper medullam exsist, suae denique potestatis honore illud de facto destituit, non solum non praetermittens ibidem libere auctoritatem ecclesiasticam exerceri; sed et superbe, ac irreverenter eam despiciens, et conculcans, et tamquam ille, cuius ambitioni totius orbi non sufficeret ambitus, huiusmodi auctoritatem in multis impudenter usurpans, reputando quasi modicum se habere, si solis praesset temporalibus, et sibi spiritualia non essent in provisionibus cathedralium, et aliarum Ecclesiarum vacantium beneficiorum, ipsarum collationibus, clericorum causis, et aliis ad forum ecclesiasticum pertinentibus ipsa inibi abuti praesumit. Ad praelatos quoque, ac alios clericali praesignitos militia manu crudelitatis indifferenter extenta, quamplurimos ex ipsis ignominiosa captione teneri, et in atroces detrudi carceres, ac tandem morti turpissimae tradi fecit, et ut de immensis ac innumeris iniuriis, et dispendiis Ecclesiarum, et cleri regni praemissi tristem et infinitam materiam brevi oraculo finiamus, sic ibi iurisdictionis ecclesiasticae plenitudo prorsus evacuata, et libertatis integritas ex voto comminuta conspicitur, quod non solum illic species non apparet Ecclesiae neque decor, sed etiam de ipsius plene substantia nil subsistit. Unde respiciens Dominus tam gravem, tamque diutinam sui afflictionem populi, et motus multa misericordia super eum, insultantis superbiae extollentiam delicere, ac tyranni furentis ferire voluit feritatem. Quare in ipsum, qui cum in honore esset, noluit intelligere, ut bene ageret, sed iniquitatem continue meditans, peiora semper operatus extitit (1), dignum et iustum, exigen-

(1) Forsitan est.

Ecclesiasticam
auctoritatem in
eo sibi vindicant.

tibus nihilominus quam multis aliis gravissimis culpis, quas ad praesens silentio relinquimus, est iudicium iaculatum; sed certe nondum, licet forsitan tremuerit, a solita malignitate quievit, quin potius, tamquam in profundum malorum demersus, desperans ulterius et contemnens, in extremum praecipitium committendo incessanter deteriora prioribus totus abiit. Verum quia principaliter ad nos spectat de praefati reparatione regni sollicitate cogitare, cum quanto specialius ad Apostolicam Sedem pertinet, ac sibi existit vicinior, tanto ipsius profectui et saluti affectuosius intendere teneamur, pensato attente, quod nisi Ecclesia, cum sit mater, plena sua libertate et auctoritate in regno ipso gaudeat, ad optatam illud laetitiam resurgere vix valebit, et si perfecte ipsa restauraretur ibidem, illius reformatio facilius et celerius subsequetur, providimus fore clero et Ecclesiis eiusdem regni, ut ad bonum et liberum statum adiutore Domino reducantur, cito, et efficaciter succurrendum, praesertim quia nostra interesse dignoscitur de regno ipso, cum sit speciale Sedis eiusdem, et rege nunc careat, memorato F. sententia-liter illo privato, libere ordinare. Hinc est quod nos de fratrum nostrorum consilio, deliberatione praehabita diligenti, constitutiones omnes, seu statuta, ordinationes, dispositiones, iussiones, et universalia talia in derogationem et praeiudicium libertatis, immunitatis, auctoritatis, et iurisdictionis ecclesiasticae aut quorumcumque iurium ecclesiasticorum a praedicto Friderico ante, vel post depositionem ipsius edita, necnon et quaslibet consuetudines contra haec in eodem regno ab ipso, vel suis praedecessoribus Siciliae regibus introductas irritas omnino et vacuas decernentes, singulis ipsius regni Ecclesiis tam saecularibus, quam regularibus, cathedralibus, et aliis, necnon et domibus religiosiis, civitates, castra, villas, terras, praedia, possessiones, homines, vassallos, affidatos, et caetera bona, et iura quibus

Innocentii de
eodem regno
cora.

Abrogatis iuris
quibus Friderici
legibus, bona
omnia Ecclesiis
restituit.

eas idem Fridericus, vel per inquisitiones, aut concessionem, seu venditionem, vel concambiam, sive quocumque alio modo destituit, plenarie restituit, integre ab ipsis cum omnibus pertinentiis et iuribus suis de caetero possidenda, concedentes eisdem et praelatis ipsorum reparandi et reaedificandi de novo civitates, terras, villas et castra sua, de mandato eiusdem Friderici in parte, vel in toto diruta, seu destructa, et faciendi inhabitata rehabilitari liberam potestatem. Post haec irrefragabili constitutione sancimus, ut in cathedralibus, conventualibus et collegiatis Ecclesiis dicti regni, quando vacaverint, electiones libere et canonice celebrentur, nec eligendi licentia, si rex in eodem regno fuerit, ab ipso aliquatenus postuletur, contraria super hoc consuetudine, cum praefato in enorme libertatis ecclesiasticae dispendium redundaret, non obstante, nec etiam post ipsas electiones regius requiratur assensus; provisiones, et concessionem, seu collationem omnes, de praelaturis, dignitatibus, personatibus, ecclesiis, praebendis, et aliis beneficiis ecclesiasticis regni praefati per iam dictum Fridericum, vel eius mandato, seu per suos officiales vacantibus eiusdem regni Ecclesiis temere praesumptas, et si quas in posterum, aut per regiam, aut quancumque potestatem aliam saecularem de ipsis praesumi contigerit, inanes, imo nullas penitus nuntiantes. Statuimus insuper, ut regi, seu aliis dominis saecularibus eiusdem regni Ecclesiarum ipsarum praelati, qui regalia non tenent ab illis, nullum deinceps fidelitatis exhibeant iuramentum. Antiqua quoque Sanctorum Patrum statuta sequentes, perpetuo firmamus edicto, ut nullus clericus, sive quaevis persona ecclesiastica regni praefati respondere, in criminalibus vel civilibus quaestionibus, etiamsi contra eam de laesae maiestatis agatur crimine, in saeculari iudicio teneatur, districtius prohibentes, ne in illo

Libere dert
lectiones libet.

Provisiones
a Friderico
factas irritas.

Prohibet clericos
ad saecularia
iudicia trahi
iudicia.

si ad ipsum etiam tracta fuerit respondere praesumat.

Decernimus etiam, ut nullus maiori excommunicatione ligatus, sive sit clericus, sive laicus, admittatur in foro ecclesiastico, vel saeculari in eodem regno prius quam absolutus fuerit ad agendum; his quoque irrevocabili decreto adiicimus, ut archiepiscopis et episcopis eiusdem regni in suis civitatibus et dioecibus, et praelatis aliis in locis, in quibus iurisdictionem spiritualem obtinent, iudicandi et puniendi secundum quod canones censent, adulteria et alia crimina tam ecclesiasticarum, quam saecularium personarum, et censuram propter hoc in ipsas ecclesiasticam exercendi, temporali iurisdictione dominis temporalibus nihilominus reservata, necnon cognoscendi de causis dotium, et universis aliis quae ad forum ecclesiasticum pertinent, et eas sententialiter decidendi plena et libera sit facultas.

Nulli ergo omnino hominum liceat nostra perpetua statuta infringere, vel eis ausu temerario contraire. Si quis autem hoc attentare praesumpserit, gravi poena se noverit percullendum.

Datum Lugduni sexto idus decembris, pontificatus nostri anno vi.

Dat. die 8 decembris 1248, pontif. anno vi.

XVIII.

Confirmantur bona omnia Ecclesiae de Rov Ratisbonen. dioecesis, cui nonnulla quoque conceduntur privilegia (1).

SUMMARIUM

Exordium. — Ecclesiam hanc sub apostolica suscipit protectione. — Bona omnia ei confirmat. — Novalia a decimis eximit. — Facultas recipiendi in monasterio: — Ab eo tamen discedendi admittitur. — Privilegiorum concessio. — De electione praepositi: — Eius paci et indemnitati con-

(1) Ex Hundio, Metropol. Salisburg., tom. III, pag. 176.

sulitur. — Innocentii PP. subscriptio: — Et sigillum. — S. R. E. cardinalium subscriptiones.

Innocentius episcopus servus servorum Dei, dilectis filiis praeposito Ecclesiae de Rov, eiusque fratribus tam praesentibus, quam futuris regularem vitam professis, in perpetuum.

Religiosam vitam eligentibus apostolicum convenit adesse praesidium, ne forte cuiuslibet temeritatis incursus, aut eos a proposito revocet, aut robur (quod absit) sacrae religionis infringat. Eapropter, dilecti in Domino filii, vestris iustis postulationibus clementer annuimus, et Ecclesiam de Rov Ratisbonensis dioecesis in qua divino mancipati estis obsequio, sub beati Petri et nostra protectione suscipimus, et praesentis scripti privilegio communimus. In primis siquidem statuente, ut ordo canonicus, qui secundum Deum et beati Augustini regulam in eadem Ecclesia institutus esse dignoscitur, perpetuis ibidem temporibus inviolabiliter observetur. Praeterea quascumque possessiones, quaecumque bona eadem Ecclesia in praesentiarum iuste ac canonice possidet, aut in futurum concessione Pontificum, largitione regum vel principum, oblatione fidelium, seu aliis iustis modis praestante Domino poterit adipisci, firma vobis, vestrisque successoribus, et illibata permaneant. In quibus haec propriis duximus exprimenda vocabulis: locum ipsum in quo praefata Ecclesia sita est cum omnibus pertinentiis suis; Ecclesiam de Perge cum omnibus pertinentiis suis, de Schenhart, de Alnbach, et de Salignperg Ecclesiam cum omnibus pertinentiis earumdem, villam, quae superior Alnbach dicitur, cum pertinentiis suis, mansos, et molendinum quae habetis in villa, quae dicitur Laber, villam quae Winckelseff vocatur, cum omnibus pertinentiis, mansos quos habetis in Asnkoven, et de Gemelkoven cum villis et pertinentiis earumdem, de Mandkurchen et de Turschdorff villas

Exordium.

Ecclesiam hanc sub apostolica suscipit protectione.

Bona omnia ei confirmat.

cum pertinentiis earumdem: villam quae dicitur Rentrestorff, cum omnibus pertinentiis suis. Domos quae habetis in civitate et suburbio Ratisbonensi. Decimas et vineas quae habetis in territorio civitatis eiusdem. Mansos quos habetis inde Langhaide, de Allekoven, de Arbenkoven, de Ursbach, et de Schnaithart villas cum pertinentiis earumdem. Mansos et decimas quos habetis in Ludmanstorff, de Gleumen, de Munchen, de Guigam, de An, et de Cuglperge villas cum pertinentiis earumdem, de Perge et de Allzhausen villas cum pertinentiis earumdem, mansos quos habetis in Wasnstorff et de inferiori Alnbach villas cum pertinentiis earumdem, cum terris, pratis, vineis, nemoribus, usuagiis, et pascuis in bosco et plano, in aquis et molendinis, in viis et semitis, et omnibus aliis libertatibus et immunitatibus suis. Sane novalium vestrorum quae propriis manibus aut sumptibus colitis, de quibus aliquis hactenus non percipit, sive de vestrorum animalium nutrimentis nullus a vobis decimas exigere vel extorquere praesumat. Liceat quoque vobis clericos, vel laicos liberos et absolutos e saeculo fugientes ad conversionem recipere, et eos absque contradictione aliqua retinere. Prohibemus insuper ut nulli fratrum vestrorum post factam professionem fas sit sine praepositi licentia, nisi arctioris religionis obtentu, de eodem loco discedere: discedentem vero absque communium litterarum cautione nullus audeat retinere. Cum autem generale interdictum terrae fuerit, liceat vobis clausis ianuis, excommunicatis et interdictis exclusis, non pulsatis campanis, dummodo causam non dederitis interdicto, suppressa voce divina officia celebrare. Chrisma vero, Oleum sanctum, consecrationes altarium, seu basilicarum, ordinationes clericorum, qui ad ordines fuerint promovendi, a dioecetano suscipietis episcopo, siquidem catholicus fuerit, et communionem sacrosanctae Romanae sedis ha-

buerit, et ea vobis voluerit sine pravitate aliqua exhibere. Prohibemus insuper ut infra parochiae vestrae nullus sine assensu dioecetani episcopi, et vestro, cappellam, seu oratorium de novo construere audeat, salvo privilegio Pontificum Romanorum. Ad haec novas et indebitas exactiones, ab archiepiscopis, episcopis, archidiaconis, seu decanis, aliisque omnibus ecclesiasticis, et saecularibus personis a vobis omnino fieri prohibemus. Sepulturam quoque ipsius loci liberam esse decernimus, ut eorum devotioni et extremae voluntati, qui se illic sepeliri deliberaverint, nisi forte excommunicati, vel interdicti sint, aut etiam publici usurarii, nullus obsistat: salva tamen iustitia illarum Ecclesiarum a quibus mortuorum corpora assumuntur. Decimas praeterea, et possessiones ad ius Ecclesiarum vestrarum spectantes, quae a laicis detinentur, redimendi, et legitime liberandi de manibus eorum, et ad Ecclesias ad quas pertinent revocandi libera sit vobis de auctoritate nostra facultas. Obvante vero te eiusdem loci praeposito, vel tuorum quolibet successorum, nullus ibidem qualibet subreptionis astutia seu violentia praeponatur, nisi quem fratres communi consensu, vel fratrum maior pars consilii sanioris secundum Deum et beati Augustini regulam providerint eligendum. Paci quoque et tranquillitati vestrae paterna in posterum sollicitudine providere volentes, auctoritate apostolica prohibemus, ut infra clausuras locorum, seu grangiarum vestrarum, nullus rapinam vel furtum facere, ignem apponere, sanguinem fundere, hominem temere capere, vel interficere, seu violentiam exercere audeat. Praeterea omnes libertates et immunitates a praedecessoribus nostris Romanis Pontificibus Ecclesiae vestrae concessas, necnon libertates et exemptiones saecularium exactionum a regibus et principibus, vel aliis fidelibus rationabiliter vobis indultas auctoritate apostolica confirmamus, et praesentis scri-

Novalia a decimis eximit.

Facultas recipiendi in monasterio.

Ab eo tamen discedendi admittitur.

Privilegiorum concessio.

De electione praepositi.


Eius paci et indemnitati confirmatur.

pti privilegio communimus. Decernimus ergo, ut nulli omnino hominum liceat praefatam Ecclesiam temere perturbare, aut eius possessiones auferre, vel ablatas retinere, minuere, seu quibuslibet vexationibus fatigare; sed omnia integra conserventur eorum pro quorum gubernatione ac sustentatione concessa sunt usibus omnimodis profutura: salva Sedis Apostolicae auctoritate, et dioecesani episcopi canonica iustitia, et in praedictis decimis moderatione concilii generalis. Si qua igitur in futurum ecclesiastica, saecularisve persona hanc nostrae constitutionis paginam sciens, contra eam temere venire tentaverit, secundo, tertiove commonita, nisi reatum suum congrua satisfactione correxerit, potestatis, honorisque sui careat dignitate, reamque se divino iudicio existere de perpetrata iniquitate cognoscat, et a sacratissimo Corpore et Sanguine Dei, et Domini Redemptoris nostri Iesu Christi aliena fiat, atque in extremo examine districtae subiaceat ultioni. Cunctis autem eidem loco sua iura servantibus sit pax Domini nostri Iesu Christi, quatenus et hic fructum bonae actionis percipiant, et apud districtum Iudicem praemia aeternae pacis inveniant. Amen.

Innocentii PP. subscriptio:

Ego INNOCENTIUS catholicae Ecclesiae episcopus subscripsi.

Et sigillum.



S. R. Ecclesiae cardinalium subscriptiones.

Ego Petrus tituli Sancti Marcelli presbyter cardinalis subscripsi.

Ego Petrus Albanensis episcopus subscripsi.

Ego frater Ioannes tituli Sancti Lau-

rentii in Lucina presbyter cardinalis subscripsi.

Ego Willelmus Sabinensis episcopus subscripsi.

Ego frater Flugo tituli Sanctae Sabiniae presbyter cardinalis subscripsi.

Ego Petrus Sancti Georgii ad Velum Aureum diaconus cardinalis subscripsi.

Ego Ioannes Sancti Nicolai in Carcere Tulliano diaconus cardinalis subscripsi.

Datum Lugduni per manum magistri Marini sanctae Romanae Ecclesiae vicecancellarii, sexto idus maii, incarnationis dominicae anno MCCXLIX, pontificatus vero domini Innocentii Papae IV anno sexto.

Dat. die 10 maii 1249, pontif. anno vi.

XIX.

Quod fratres Minores ordinis S. Francisci Conventuales denominentur.

Innocentius episcopus servus servorum Dei, dilectis filiis fratribus ordinis Minorum, salutem et apostolicam benedictionem.

Cum tamquam veri et fideles Christi ministri elegeritis vobis in domo Domini mansiones, dignum esse credimus, ut habitacula vestra inter alias honorabiles congregationes fidelium statuamus.

§ 1. Hinc est igitur, quod vestris supplicationibus inclinati, praesentium auctoritate decernimus, ut Ecclesiae vestrae omnes ubi conventus existunt, Conventuales vocentur.

§ 2. Vobis nihilominus licentiam concedentes, ut in ipsis Ecclesiis, ad opus fratrum et familiae vestrae, habere libere coemeteria valeatis.

Nulli ergo etc. (*extendatur sanctio poenalis*).

Datum Lugduni nonis aprilis, pontificatus nostri anno septimo.

Dat. die 10 maii 1249, pontif. anno vi.

XX.

Civibus insulae Maioricarum conceditur, ne in posterum ad lites dirimendas loca remota petere cogantur (1).

SUMMARIUM

Insulae distantia a terra firma. — Privilegium. — Clausulae.

Innocentius episcopus servus servorum Dei, venerabili fratri episcopo, ac dilectis filiis clero, consulibus iuratis, et Universitati insulae Maioricarum, salutem et apostolicam benedictionem.

Insulae distantia a terra firma.

Propter maris pericula insulam vestram undique circumdantia, ac frequentes piratarum ac paganorum incursus, ad terram firmam distantem ab insula ipsa fere per ducenta milliaria, prout asseritis, pervenire sine gravi dispendio non potestis.

Privilegium.

Cum itaque nonnulli, sicut accepimus, ad loca remota saepe vos citare procurerent, et propter impedimenta praemissa litibus cedere, seu cum adversariis damnosas inire cogamini pactiones; nos obtentu charissimi in Christo filii nostri illustris regis Aragonum, qui favente divinae virtutis auxilio dictam insulam de manibus paganorum eripuit, et pro vobis apostolicam gratiam per speciales litteras imploravit, dispendiis vestris in hac parte occurrere sollicitudine paterna volentes, vobis auctoritate praesentium, ut per litteras Apostolicae Sedis, aut legatorum eius, quae de ipsa insula, et indulgentia huiusmodi plenam et expressam non fecerint mentionem, extra eandem insulam super bonis, quae infra ipsam habeatis, vos, vel aliquis vestrum non possitis de caetero ab aliquibus conveniri, dummodo parati sitis ibidem coram competenti iudice de vobis conquerentibus iustitiae plenitudinem exhibere.

Clausulae.

Nulli ergo omnino hominum liceat hanc paginam nostrae concessionis infringere,

(1) Ex Dacheril Spicileg., tom. vii, pag. 231.

vel ei ausu temerario contraire. Si quis autem hoc attentare praesumpserit, indignationem omnipotentis Dei et beatorum Petri et Pauli apostolorum eius se noverit incursurum.

Datum Lugduni pridie idus maii, pontificatus nostri anno septimo.

Dat. die 14 maii 1250, pontif. anno vii.

XXI.

Quod nullus archiepiscopus, nec Apostolicae Sedis legatus fratres ordinis Praedicatorum ad episcopatum, vel alias dignitates possit assumere: iis vero huiusmodi dignitates accipere non liceat invitis ordinis superioribus (1).

SUMMARIUM

Causae edendae sanctionis. — Sanctio. — Clausulae.

Innocentius episcopus servus servorum Dei, dilecto filio magistro ordinis fratrum Praedicatorum, salutem et apostolicam benedictionem.

Petitio tua nobis exhibita continebat, quod cum aliqui fratres tui ordinis in aliquibus Ecclesiis in episcopos eliguntur vel postulantur, iidem fratres, licet proprium velle non habeant aut nolle, propter hoc, quod renuntiaverunt mundo et propriae voluntati, et per se nequeant consentire; tamen irrequisitis prioribus suis provincialibus, quorum licentia et testimonium essent in talibus requirenda, electionibus sive postulationibus de se factis temere consentiunt, et locorum archiepiscopi fratres ipsos in episcopos assumere, ac ordinare praesumunt: propter quod plerumque in eodem ordine scandalum generatur, super quo provideri per Sedem Apostolicam humiliter postulasti.

Cum autem praedictum ordinem, cum

(1) Edidit Martene, Thesaur. Anecd., tomo I, col. 1046.

Causae edendae sanctionis.

ait rectae vitae speculum, salutiferae conversationis exemplar, velimus semper de bono in melius. Deo propitio, prosperari: auctoritate praesentium de speciali gratia districtius inhibemus, ut nulli praefati ordinis fratres, si eos in episcopos eligi, aut postulari forte contigerit, electioni, sive postulationi de se factae audeant consentire, nec aliquis archiepiscopus, seu quicumque alius praelatus, vel etiam legatus Ap. Sedis ipsius dictos fratres, nisi de tua, vel ipsorum priorum provincialium, qui pro tempore fuerint, licentia et consensu, aut Sedis eiusdem speciali mandato ad episcopatus et alias dignitates extra dictum ordinem assumere vel ordinare praesumat. Nos enim decernimus irritum et inane quicquid contra inhibitionem huiusmodi a quibuscumque contigerit attentare, auctoritate Sedis Apostolicae semper salva. Nulli ergo omnino hominum liceat hanc nostrae constitutionis et inhibitionis paginam infringere, vel ei ausu temerario contraire; si quis autem hoc attentare praesumpserit, indignationem omnipotentis Dei, et beatorum Petri et Pauli apostolorum eius se noverit incursum.

Datum Perusii tertio idus iulii, pontificatus nostri anno nono.

Dat. die 13 iulii 1281, pontif. anno ix.

XXII.

Privilegia nonnulla ac libertates Neapolitanis conceduntur (1).

SUMMARIUM

Exordium. — Friderici mors et impietates. — Neapolitanorum collaudat constantiam ob fractos Manfredi, aliorumque impetus. — Datum aliis adipiscendae libertatis exemplum. — In clientelam apostol. illorum suscipit bona. — Decernit tantum Sedi Apostolicae obnoxios futuros. — Praeficiendi sibi magistratus auctoritatem concedit: — Probasque confirmat consuetudines. — Erepta praeterita iura in antiquum

(1) Ex Raynaldo ad an. 1281, pag. 449.

statum restituit. — Clausulae. — Innocentii PP. — Et S. R. E. cardinalium subscriptiones.

Innocentius episcopus servus servorum Dei, dilectis filiis Comuni Neapolitano, in perpetuum.

Purae fidei claritate conspicua Neapolitana civitas, et lucidis in se, ac magnificis proficit actibus, et cunctis aliis regno Siciliae spectabili, sectandaeque probitatis exemplo, libertatis amplectendae profectum manifeste propinat; propter quod civitas ipsa, quae a moenium fundatione suorum generosa, populo nobilis, nobilior gestorum ingenuitate conspicitur; sic apud proximos et remotos multipliciter redditur suorum processuum strenuitate laudabilis, et penes nos, et Apostolicam Sedem praecipuis attollenda favoribus, et gratis potioribus honoranda, quod non solum per singulas vicinae Italiae regiones clare resonat suae praeconium bonitatis; sed et longius tuba insonat laudis eius, suaeque remotius acta voluntatis famae diffusionem notescant; et nos, dictaque Sedes totis affectibus ducimur, ut condignis eam honoribus sublimemus.

Sublato namque Friderico quondam Romano imperatore ac Siciliae rege de medio; qui austeritate Pharaos, Herodes impietate, saevitiaque Nero praedictum regnum continuae afflictionis iugo depresserat, et furoris immanis gladio laniabat; eadem civitas, ut regnum ipsum ad statum reduceretur liberum et tranquillum, et a pristinae oppressionis erueretur oneribus, quae adhuc illius pestilentis reliquiae, ipsius videlicet filii paternae malitiae successores, eidem inferre regno more praeterito, utpote genimina viperina venenosa egressa de colubro moliuntur; necnon et ad devotionem praemissae Sedis, ad quam illud specialiter pertinere dignoscitur, cordis stabilitate rediret; ferventis vigore spiritus animata, virium collecto robore, statim ipsius regni, quin immo et dictae Sedis negotium, prout etiam

Neapolitanorum collaudat constantiam ob fractos Manfredi, aliorumque impetus.

ante praefati Friderici decessum proposito firmo conceperat; de divino, et Matris Ecclesiae confisa suffragio constanter assumpsit, resistens patenter praefatis nequitiae filiis, eorumque conatus assiduos virtuose propulsans, sicque in reliquos dicti regni ex huiusmodi repugnandi audacia commendanda resistendi transfusa fiducia, praedictorum iniquorum temerarius refrenatus est ausus, et superbus eorumdem processus non modicum impeditus. Non in hoc utique civitas ipsa proprium dumtaxat attendit commodum, non suis tantum utilitatibus inhiavit, sed ad profectus profecto communes purae intentionis direxit affectum, publicae quodammodo tranquillitati et comoditati prospexit, in libertatis quidem antiquae recuperatione praebula, in exhibitione plenae devotionis anterior, prior, ac potior contra hostes, et in magnifica tanti negotii prosecutione conspectior, unde valde promeruit specialium privilegiorum insigniis a Sede Apostolica decorari.

In clientelam apostol. illorum suscipit bona.

Nos igitur praemissis omnibus diligenti consideratione pensatis, volentes propterea eiusdem Neapolitanae civitatis honorem praedictae Sedis donis sublimibus et perpetuis ampliare, vestris in hoc desideriis assensu benevolo concurrento: personas vestras, et civitatem ipsam in devotionem Sedis persistentes eiusdem cum omnibus bonis, etc., usque communimus; de fratrum nostrorum consilio, stantes, ut eadem civitas perpetuo praefatae Sedis remaneat: ita quod Romana Ecclesia semper absque ullo medio retinens illam sibi, sicut terram Campaniae, vel Maritimae, nunquam eam a suo excludat gremio, neque aliquando ipsam, vel ius quomodocumque in ea, seu pertinentiis, aut in territorio eius cuiquam sive imperatori, sive regi, sive duci, aut principi, vel comiti, seu quicumque alii personae concedat. Sane ut ex affluentia beneficiorum Sedis eiusdem exultet ipsa civitas gaudio pleniori, vobis illam omnino libertatem in assumendis potestatibus,

Praeficiendi sibi magistratus auctoritatem concedit.

dummodo fideles vel devotos Ecclesiae assumatis, et in statutis edendis, ita tamen quod nihil in eis contra praefatam Romanam Ecclesiam, et libertatem ecclesiasticam praesumatis, ac aliis, apostolica auctoritate concedimus, quam fideles de patrimonio divi Petri habere noscuntur. Porro rationabiles consuetudines approbatas dudum in civitate ipsa, et pacifice observatas usque ad tempus, quo iam dictus Fridericus suas constitutiones in regno edidit memorato, necnon et ordinationes post ipsius Friderici obitum inter milites et populares civitatis eiusdem, et pro honore et pacifico ipsius civitatis statu ad honorem Ecclesiae factis, super quibus instrumenta dicuntur esse confecta; vobis de speciali gratia confirmamus.

Ad haec omnia, quae civitas ipsa, vel cives aliquando tenuerunt, quorum quidem iusta per superiorem privatio non apparet, exceptis iis, quae per singulares personas praefatae civitatis teneri noscuntur, universitati vestrae confirmamus de praedictae Sedis munificentia liberali.

Decernimus ergo, ut nulli omnino hominum liceat hanc paginam nostrae protectionis, constitutionis, concessionis, confirmationis et collationis infringere, vel ei ausu temerario contraire. Si qua igitur in futurum ecclesiastica, saecularisve persona paginam ipsam sciens, contra eam venire tentaverit, secundo, tertiove commonita, nisi reatum suum congrua satisfactione correxerit, potestatis, honorisque sui dignitate careat, reamque se divino iudicio existere de perpetrata iniquitate cognoscat, et a sacratissimo Corpore et Sanguine Dei et Domini Redemptoris nostri Iesu Christi aliena fiat, atque in extremo examine districtae ultioni subiaceat. Cunctis autem paginam ipsam observantibus sit pax Domini Nostri Iesu Christi, quatenus et hic fructum bonae actionis percipiant, et apud districtum Iudicem praemia aeternae pacis inveniant. Amen.

Ego INNOCENTIUS Catholicae Ecclesiae episcopus subscripsi.

Ego Raynaldus Ostiensis et Velleitrensis episcopus subscripsi.

Ego Petrus Albanen. episcopus subscripsi.

Ego Stephanus Sanctae Mariae Transyberim presbyter cardinalis tituli Callisti subscripsi.

Ego Petrus tituli Sancti Marcelli presbyter cardinalis subscripsi.

Ego frater Ioannes Sancti Laurentii in Lucina presbyter cardinalis subscripsi.

Ego Richardus Sancti Angeli diaconus cardinalis subscripsi.

Ego Petrus Sancti Georgii ad Velum Aureum diaconus cardinalis subscripsi.

Ego Willelmus S. Eustachii diaconus cardinalis subscripsi.

Datum Perusii per manum magistri Marini sanctae Romanae Ecclesiae vicecancellarii idibus decembris, indictione decima, incarnationis dominicae anno millesimo ducentesimo quinquagesimo primo, pontificatus vero domini Innocentii Papae quarti anno nono.

Dat. die 13 decembris 1251, pontif. anno IX.

XXIII.

Privilegium, quo comitatus Lyciensis Marco Ziani ducis Venetiarum filio post Tancredi avi sui obitum conceditur (1).

SUMMARIUM

Exordium. — Concessio dicti comitatus. — Fidelitatis praestandum iuramentum. — Clausulae.

Innocentius episcopus servus servorum Dei, nobili viro Marco Ziano nato bonae memoriae P. Ziani ducis Venetorum.

Sedes Apostolica debitae providentiae oculo ducitur circa cunctorum suorum merita devotorum, nec unquam lancem iustitiae deserit, secundum quam,

(1) Ex Regest. Vatic. edidit Ughell., Ital. Sac., tom. IX, pag. 79, ubi de Lycien. episcopis.

actibus fidelium singulorum provida maturitate libratis, et digne ipsos amplectitur dilectionis favorabiliter brachiis, et dono specialis benevolentiae prosequatur, praesertim quos clara nobilitas et origo nobilitat generosa.

Hinc est, quod cum sicut te intimante accepimus, comitatus Lycien. ad bonae memoriae Tancredum avum tuum spectaverit, idemque comitatus postmodum ab aliis occupatus fuerit ac detentus; nos attendentes quod apud Sedem eandem te non solum nobilitas generis, sed clarae devotionis sinceritas et merita integra, quibus te nobis, et eidem Sedi acceptum laudabiliter exhibes, favorabiliter interpellant, tuis precibus benigno concurrentes assensu, comitatum iamdictum in regno nostro Siciliae existentem, cum iuribus omnibus et pertinentiis suis tibi plenarie restituimus, et ut ferventius in Ecclesiae devotione persistas, de novo insuper in feudum concedimus de gratia speciali, nisi ad alium pertineat in devotione Ecclesiae persistentem. Non obstante si nobilis vir comes Tigrisius de Mudignana, vel eius filii ius in comitatu ipso se habere asserant ratione nobilis mulieris Alberiae materterae suae uxoris, ipsius et eiusdem avi sui filiae potioris; cum iidem comes et filii quondam F. Romanorum imperatori contra Ecclesiam adhaeserint, et adhuc ipsam offendere non desistant, propter quod gratia et beneficio ipsius Ecclesiae reddiderunt penitus se indignos. Volumus autem, ut postquam eiusdem comitatus possessionem habueris, pro ipso homagium et iuramentum fidelitatis, et alia Ecclesiae Romanae, seu regi, qui per eam pro tempore fuerit in regno praefato, tenearis praestare, quae alii vassalli eiusdem regni pro comitatibus, quos ibi obtinent, praestare tenentur. Nulli ergo omnino hominum hanc nostrae restitutionis et concessionis paginam infringere liceat, vel ei ausu temerario contravenire. Si quis autem hoc attentare praesumpserit, indignationem omni-

Concessio dicti comitatus.

Fidelitatis praestandum iuramentum.

Clausulae.

potentis Dei, et beatorum Petri et Pauli apostolorum eius se noverit incursum.

Datum Perusii duodecimo kalendas martii, pontificatus nostri anno nono.

Dat. die 19 februarii 1252, pontif. anno IX.

XXIV.

Hadriensis Ecclesia in cathedralem erecta Pennensi unitur, cum decreto ut Pennensis episcopus Hadriensis quoque dicatur, certis quoque addictis pactis et conditionibus (1).

SUMMARIUM

Exordium. — Hadrien. Ecclesia in cathedralem erecta per delegatum apostolicum et Pennensi unita. — Unionis litterae. — Utrumque nomen ab episcopo sumendum. — Dos Hadrien. Ecclesiae conficienda. — Domus episcopalis. — Canonorum numerus — Electio communis episcopi. — Clausulae.

Innocentius episcopus servus servorum Dei, capitulo, et universo clero, necnon potestati, consilio et Communi civitatis Hadriensis, salutem et apostolicam benedictionem.

Exordium. Licet ea, quae de mandato nostro fiunt, in se robur obtineant firmitatis, ut tamen intemerata consistant, cum nostro fuerint praesidio communita, ea libenter apostolico munimine roboramus.

Hadrien. Ecclesia in cathedralem erecta per delegatum apostolicum et Pennensi unita.

Cum itaque venerabilis frater noster Albanensis episcopus attendens devotionem, quam ad Apostolicam Sedem habetis, locum Hadriae de speciali mandato nostro vocari decreverit civitatem, et ecclesiam Sanctae Mariae Hadrien. in cathedralem erigendam, tam ipsam, quam Pennensem Ecclesiam ad invicem duxerit uniendo, prout in ipsius litteris super hoc confectis plenius continetur: hoc quod per eundem episcopum in hac parte factum est, ratum habentes et gratum, id de fratrum nostrorum consilio autho-

(1) Ex Regest. Vatic. edidit Ughell., tom. I, pag. 1438, ubi de Pennen. Ecclesia.

ritate apostolica confirmantes, tenorem litterarum ipsarum de verbo ad verbum praesentibus inseri facientes, qui talis est:

Petrus miseratione divina episcopus Albanensis dilecto in Christo capitulo, ac venerabili clero, necnon etc. . . potestati, concilio, et Communi civitatis Hadrien. salutem in Domino sempiternam. Devotionis et fidei vestrae meretur affectus, ut Sedes Apostolica mater nostra vos habeat tamquam filios speciales, et in iis, quae honorem vestrum respiciunt, sic se favorabilem exhibeat et benignam, ut per hoc vestra probata sinceritas erga Sedem eandem continuo vigeat, et laudabilibus proficiat incrementis. Ut igitur ex fervore devotionis, quam ad Romanam Ecclesiam pro exhibitione operis habuistis hactenus, et habebitis dante Domino in futurum, sentiat vobis favorem apostolicum accrevisse, nos de speciali mandato domini Papae personas vestras honorare volentes, et locum Hadriae, in quo populus tantae fidei, et devotionis cohabitavit specialis decoris praereminentia insignire, ipsum vocari decrevimus civitatem, et eum episcopali dignitate in perpetuum volumus decorari. Ad haec Ecclesia Sanctae Mariae Hadriae, quae olim de Pennensi esse solebat, in qua saecularis praelatus praefuerat, in cathedralem erigimus, tam ipsam, quam Pennensem Ecclesiam ad invicem unientes, ut utraque cathedralis existat, et tam Hadriensis, quam Pennensis episcopus nominetur, ita videlicet, ut cum eundem episcopum Hadriae, vel in Hadriensi Ecclesia adesse contigerit, ut addatur gratiae, et per hoc locus ipse habeatur insignis, Hadrien. praefertur Pennensi Ecclesiae in scriptura. Sed cum idem episcopus in civitate, vel Ecclesia Pennensi fuerit, Pennensis Ecclesia praefertur. Ecclesiae vero archidiacono, et canonicis Pennen. iura sua volumus illibata servari, quia per hanc unionem nolumus eos in suis iuribus pati aliquod praerudicium vel iacturam. Sane quia non de-

Unionis litterae.

Utrumque nomen ab episcopo sumendum.